

To'on yó'o kían mií noó ni taa San Pablo ni sa'an noó na ñoo Corinto

Ká'an Pablo ndisá'án

¹ Yu'u kúú Pablo, na ni nakana Ndios kakuu iin apóstol Jesucristo, dá kane'i to'on na, tátō'on kī'o kóni mií Ndios. Ta yu'u xí'ín ñani yo Sóstenes

² ká'an ndu ndisá'án xí'ín ndo'ó, na kúú ñayuu Ndios ndéi ñoo Corinto, ndo'ó na ni nduvii Ndios sa'á ña ni kee Cristo Jesús, ta ni kana na ndo'ó ña kakuu ndó ñayuu mií ná, ta dión ta'ani ni kee na xí'ín ñayuu ndéi ndidaá kúú xían, na nákonì ña sato'o na kúú Jesucristo, na kúú sato'o na xí'ín sato'o yo.

³ Ta mií tatá yo Ndios xí'ín sato'o yo Jesucristo ná kee ña manì xí'ín ndó, ta nakì'o na ña koo va'a ini ndo.

Nákì'o Pablo ndivé'e sa'á ña ni xì'o oon Ndios noó ñayuu ñoo, dá ná katì'a na kechóon na noo ná

⁴ Ta daá kuití vá náki'o yu'u ndivé'e noo tatá yo Ndios sa'a ndo'ó, sa'a ndidaá kúú ña manì ña kían ni xì'o oon na noo ndo sa'a Cristo Jesús.

⁵ Dá chì ni kekuíká Ndios ndo'ó noo ndidaá ña'a sa'á ña ni kee Jesús, chì ni kekuíká ná ndo'ó xí'ín to'on ká'an ndo, xí'ín ña koo ndichí cháá ka ndo xí'ín to'on na.

⁶ Ta ñoo kían ná'a ña miían ndaa ndíta ndaa ndo xí'ín to'on va'a ni seídó'o ndó sa'a Cristo.

7 Sa'á ñoó ni iin tó'ón ña'a o kámani noo ndo, dá kat'i'a ndó kee ndó choon Ndios xían nani ndáti ndó kasandaá kuu na'a noo sato'o yo Jesucristo.

8 Ta mií tatá Ndios kúu na chindeé ndo'ó, dá kandita toon ndó xí'ín ná nda noo ndí'i, dá kían ni iin tó'ón ta'on kuachi o koo sata ndo tá ná kasandaá kuu nandió koo tuku Jesucristo, na kúu sato'o yo, kasaá na.

9 Iin na ndaa kúu Ndios, ta mií ná kúu na ni nakana ndo'ó ña kandita ndó xí'ín de'e na Jesucristo, na kúu sato'o yo.

Ko vá'a ña tá'anda tá'an na kúu kuendá Jesús

10 Seí nda'ávij noo ndo'ó, ñani miij, xí'ín kuu sato'o yo Jesucristo ña iin tó'ón ná kakuu ña nákani ini ndo, ta ná dá'a ni ka'anda tá'an ndó. Nóchí kandeí ndó, iin tó'ón ná kakuu ñaxintóni ndo, ta iin tó'ón ná kakuu ña nákani ini ndo.

11 Chi ni katóni inij, ñanij, ni kee na ve'e Cloé, ña naá tá'an ndó noo ña kándisa ndó.

12 Díon ká'in xí'ín ndó, dá chi dao ndó kaá ña kúu ndó kuendá Pablo, ta dao ka ndo kaá ña kúu ndó kuendá Apolos, ta dao ka ndo kaá ña kúu ndó kuendá Cefas, ta dao ka ndo kaá ña kúu ndó kuendá Cristo.

13 ¿Á kua'a vá ni ta'anda Cristo, xiní ndo? ¿Á ni sarkaa Pablo ndika cruz, xiní ndo? O, ¿á xí'ín kuu yu'u ni sodo ndúta ndo'ó, ká'án ndó?

14 Náki'oi ndivé'e noo Ndios chi ni iin tó'ón ndó ko ní dákodo ndúta yu'u, sava'a Crispo xí'ín Gayo va kúu ra ni dakódo ndúta yu'u.

15 Sa'á ñoó ni iin ñayuu o kúu kaa ña ni sodo ndúta ná xí'ín kuu yú'u.

16 Ta ni dakódo ndúta ta'anii na ve'e Estéfanos, tído ko ndúsaa inii á ió dao ka na ni dakódo ndútaí.

17 Dá chi ko ní sa'ándá Cristo choon nooi ña dakódo ndútaí ndo'ó, di'a ni xi'o na choon nooi ña dána'i to'on va'a na. Ta ko ndúkú ta'on yu'u to'on ndichí dáxino inii ndo'ó, chi ko kónii kenóoi ña ni kee Cristo tá ni xi'i na sa'a yo ndika cruz.

Jesucristo kúú ndée mií Ndios xí'ín ña ndichí mií ná

18 Dá chi to'on va'a ña ká'an sa'á ña ni xi'i Cristo ndika cruz kían diki noo na kua'an naá. Tído noo yóo, na ni'í ña káki, to'on yó'o kúú ndée mií Ndios ña dákaiki ñaá.

19 Dá chi di'a ká'an tuti ij Ndios:

Dánaá vai ña ndichí ta,
ta kañó'í ñaxintóni ñayuu kándaá ini.

20 Sa'á ñoo, ¿ndi ndó'o na kómí ña ndichí viti, tá dáá? Ta, ¿ndi ndó'o na dákuá'a ña ndichí? Ta, ¿ndi ndó'o na ká'an to'on ndichí ió ñayuu yó'o? ¿Á ko ná'á ta'on ndó ña ni kenóo Ndios ña ndichí ió ñayuu yó'o?

21 Ta xí'ín ña ndichí kómí Ndios ni chikaa ini na ña o kásandaá ñayuu kana'á ná mií Ndios xí'ín ña ndichí ñayuu yó'o. Di'a ni nata'an ini mií Ndios dákaiki na ñayuu kándisa to'on dána'a ndu, va'ará to'on diki va kían noo dao ka ñayuu.

22 Ta na Israel kúú na xika iin ña ndato, dá kandía na, ta na griego kúú na ndúkú to'on ndichí, dá kandía na.

23 Tído ndu'u kúú na dána'a sa'a Cristo, na ni xi'i ndika cruz. Ta to'on yó'o kían dár'u'u na Israel, ta kían to'on diki noo na griego.

24 Tído noó ñayuu ñi nakana mií Ndios, á mií ná kúú ná na Israel, o á mií ná kúú ná na griego, Jesucristo kúú ndée mií Ndios xí'ín ña ndichí mií ná.

25 Dá chi to'on Ndios, ña chínani ñayuu kúú to'on ñi, ña ndichí cháá ka kían o duú ña ndichí kómí na ndéi ñayuú yó'o. Ta ña'a Ndios, ña ká'an ñayuu kúú ña vitá cháá ka, di'a ña'a ndakí cháá ka kían o duú ña ndakí noó ñayuu.

26 Sa'a ñoo, kande'é ndó, ñani, chi tá ñi nakana Ndios ndo'ó xoo mií ná, cháá vá ndó ñi sa kuu ñayuu ndichí noó ñayuu ndéi ñayuú yó'o, ta cháá ta'ani ndó ñi sa kuu ñayuu né'e choon, ta cháá ta'ani ndó ñi sa kuu de'e na kuiká ndaya'i.

27 Chi ñi kaxi Ndios ñayuu xixi noó ñayuu ndéi ñayuú yó'o, dá kenóo na ñayuu kaá ndichí. Ta ñi kaxi ta'ani na ñayuu ko ndakí noó ñayuu ndéi ñayuú yó'o, dá kenóo na ñayuu kaá ndakí.

28 Ta ñi kaxi ta'ani na ñayuu nóo xí'ín ñayuu ko ndaya'i noó ñayuu ndéi ñayuú yó'o, xí'ín na koó ña'a kúú, dá dátuu ná ña ndaya'i ñayuú yó'o.

29 Kí'o dión ñi kee Ndios, dá kían ni iin tó'on ñayuu ná o kúu chindaya'i mií noó ná.

30 Ta mií Ndios kúú na ñi xi'o ña ñi nduu yó ñayuu Cristo Jesús, ta sa'a Cristo ñi xi'o na ña ndichí noó yo, xí'ín ña kandoo vii yo noó ná, xí'ín ña koo vii yo, xí'ín ña kaxi yó tixi ndá'a kuachi yo.

31 Kí'o dión ñi kee Ndios, dá chi kí'o di'a va ká'an tuti ií ná: “Tá'an na ká'an kuryíí, kánian kuryíí ná sa'a ña ñi kee sato'o yo Ndios sa'a ná.”

2

Dána'a Pablo sa'a ña ñi xi'i Jesucristo ndika cruz

sa'a yo

¹ Sa'á ñoó, ñani, tá ñi saai noo ndéi ndó ñi daná'í to'on ñi ñí'í noo mií Ndios, kó ní kéchóoin to'on táyíí o to'on ndichí.

² Chì ñi chikaa inií dána'í noo ndo sava'a sa'a Jesucristo, xí'ín sa'á ña ñi kee na sa'a yo ndika cruz.

³ Tá ñi sa ioi xí'ín ndó, nda'í va ñi sa ioi, ta ñi sa ndej ñino nda'oi ña yu'íi.

⁴ Ta kó ní ndúkúí to'on luu, ña kána ñaxintóni taa ñayuu yó'o ka'ín xí'ín ndó, dá xino ini ndo. Chì di'a ñi na'a mií Espiritu ií Ndios ndée kómí ná tein ña ñi daná'í noo ndo.

⁵ Díón dá kían ná dá'a ni kandeé iní ndo Jesús kee ña ndichí ió ñayuu yó'o, di'a kandeé iní ndo ná kee ndée Ndios.

Kómí yó Espiritu ií Ndios

⁶ Tído ndu'u kúú ña ká'an to'on ndichí xí'ín na ndíta ñi sisa xí'ín ña kándísa na, tído to'on ndichí yó'o, kó kían to'on ndichí kómí ña kúú kuendá ñayuu yó'o, ta kó kían to'on ndichí dándáki taa né'e choon ñayuu yó'o, tá'an ra sa kua'an naá vá.

⁷ Tído ndu'u kúú ña ká'an sa'a to'on ndichí, ña ná'a iin tó'ón míí Ndios, tá'an ña sa kaa de'é. Ta ña ndichí yó'o kían ña ñi chikaa ini mií ná kee na tá kó ñá'a kava'a na ñayuu yó'o, dá ná kuu natiin yó ñaño'ó k'i'o na noo yo.

⁸ Ta ni iin tó'ón taa né'e choon ñayuu yó'o kó ní xí'o kuendá sa'á ña ndichí yó'o, dá chì tá ñi xí'o ra kuendá sa'án, dá kían o chírkaa ta'on ra sato'o yo Jesús, ña kómí ndidaá ñaño'ó, ndika cruz, ní kúu.

⁹ Chì di'a ká'an tuti ií Ndios:
Tá'an ña'a kó ní xiní ñayuu xí'ín noo ná,
xí'ín ña kó ní seídó'o na,

xí'ín ña ni iin kuu ko ní nákanini ini nio ná sa'a,
ñoó kían ni kenduu Ndios ki'o na noó ñayuu kóni
ñaá.

10 Tído ndidaá kúú ña yó'o kían ni na'a Ndios noo
yo ni kee Espíritu ij míi ná. Chi Espíritu ná kúú na
ndé'é va'a ndidaá kúú ña'a, va'ará nda maá ini nio
Ndios kían.

11 Ta, ¿ndá yoo kúú iin ta ná'á ndi nákanini ini
iin ka ta? Sava'a iin tó'on espíritu nákaa ini ra
kían ná'á ndi kían nákanini ini ra. Ta dión ta'ani, ni
iin tó'on ta'on ñayuu ko ná'á ndi nákanini Ndios,
sava'a iin tó'on Espíritu mií vá ná ná'á ndi kían
nákanini na.

12 Ta yóo kúú na ko ní nátiin ta'on yó espíritu
kómí na kúú kuendá ñayuú yó'o. Di'a ni natiin yó
Espíritu ni kii noo míi Ndios, dá kuu kandaa ini yo
ndi kían kúú ña va'a ni xi'o Ndios noo yo.

13 Ta sa'a ndidaá kúú ña'a yó'o ká'an ndu, tído
ko ká'an ta'on ndu táto'on ki'o dána'a na kómí ña
ndichí ñayuú yó'o. Di'a dána'a ndu xí'ín to'on ni
daná'a Espíritu ij Ndios noo ndú, chi dána'a ndu
to'on ni kii noo Espíritu Ndios noo na kómí Espíritu
ná.

14 Ta ñayuu ko kómí Espíritu ij Ndios, o kúu ta'on
natiin na ña dána'a Espíritu ij Ndios, dá chi diiki va
kían noo ná. Ta o kúu ta'on katóni ini na ñá. Dá chi
sava'a na kómí Espíritu ij Ndios kúú na kuu kandaa
ini sa'an.

15 Ta ñayuu kómí Espíritu Ndios kúú na keyíko
va'a sa'a ndidaá ña'a, ta ko iin ta'on kuu keyíko sa'a
ná.

16 Chi di'a kaá tuti ij Ndios: “¿Ndá yoo kandeé
kana'á ndi kían nákanini ini sato'o yo Ndios? ¿Ndá

yoo kat̄i'a dána'a noo ná?" Tído yóo kúu na kómí ñaxintóni Cristo.

3

Kéchóon nduú Pablo xí'ín Apolos noo Ndios

¹ Tído ko ní kúu ta'on dána'i noo ndo'ó, ñani, táto'on k̄i'o dána'i noo ñayuu kómí Espiritu ī Ndios. Di'a ni daná'i noo ndo táto'on k̄i'o dána'i noo ñayuu kée ña kóni ñíi ná, ch̄i táto'on takuálí vá kúu ndó noo to'on Cristo.

² Sa'á ñoó ni xi'oi lechí va ni xi'i ndó táto'on k̄i'o kée na xí'ín takuálí, dá ch̄i o kúu keí xí ña seí na yatá. Ta k̄i'o dión ta'ani ndó'o ndo'ó, dá ch̄i ko ní kúu ta'on natiin ndó ña ndichí cháa ka sa'a Ndios, ta nda viti o kúu ī vá natiin ndóan.

³ Dá ch̄i kée ī vá ndó ña kóni ñíi ndo, dá ch̄i ió ī vá ña u'u ini ndo, ta naá tá'an ī vá ndó, ta sa'ándá tá'an ī vá ndó. ¿Á ko ná'á ta'on ndó ña ña yó'o ná'a ña kúu ndó ñayuu kée ña kóni ñíi, ta ná'a ta'anian ña kée ndó táto'on kée ñayuu ko ná'á Ndios?

⁴ Dá ch̄i tá ká'an ndo ña kúu ndó kuendá Pablo, o ká'an ndo ña kúu ndó kuendá Apolos, ¿á ko ná'á ta'on ndó ña ña yó'o ná'a ña kúu ndó ñayuu kée ña kóni ñíi?

⁵ Ta, ¿ndí k̄ián kúu Pablo, ká'an ndó? Ta, ¿ndí k̄ián kúu Apolos, ká'an ndó? Ch̄i sava'a na kéchóon noo Ndios oon va kúu ndu'u, ta ni daná'a ndu noo ndo, dá ni kandisa ndó. Ch̄i iin rá iin ndu kée choon ni xi'o sato'o yo Ndios noo ndú.

⁶ Yu'u kúu ra ni ni'i choon ña chi'i tata, ta Apolos ni ni'i choon ña ko'oni naan. Tído mií vá Ndios kúu na dákuá'anoan.

7 Sa'á ñoó ni ña'a ko kúú taa ni chi'i tata, ni ra ni so'onian, sava'a Ndios vá kúú na ndáya'i, chi mii ná kúú na dákuá'anoan.

8 Iin nóó vá ndáya'i taa ni chi'i tata, xí'ín ra ni so'onian, va'ará iin rá iin ra nátiin ya'i tát'on k'i'o káa choon ni kee ra.

9 Chi ndu'u kúú ra kéchóon noo choon Ndios, ta ndo'ó kúú tát'on ño'ó xíti noo ná, ta kúú ta'ani ndó tát'on k'i'o iin ve'e, ña nákaa na káva'a na.

10 Ta sa'á ña maní ni kee Ndios xí'ín, sa'á ñoó kúú tát'on iin na t'i'a kava'a ve'e, chi ni chindú'i sa'án. Ta dao ka na kúú na dáxi'noan. Sa'á ñoó kánian kandaa iin rá iin na choon kée na, dá kandoo va'an.

11 Dá chi ko íin ka kuu chindu'u iin ka sa'a ve'e noo ña sa kándu'u, chi sa'a ve'e ñoó kúú mii Jesucristo.

12 Ta sata sa'a ve'e yó'o kuu va ndane'e na iin ve'e xí'ín oro, o plata, o xí'ín yuu luu ndáa, o xí'ín yító, o xí'ín ñoo tei'í, o xí'ín ra itá tirió.

13 Tído iin rá iin choon kían ná'a mián á choon va'a kían o koó. Chi tá ná kasandaá kuu keyíko Ndios sa'án, dá kandaa inió ndi ndo'an kee ño'ó kéj. Ta díon keean xí'ín iin rá iin choon, dá chi ño'ó kéj kían korndodó ñaá.

14 Tá koó ña'a ndo'o ña ni kava'a na sata sa'a ve'e ñoó, dá kían natiin na ya'i sa'a choon ni kee na.

15 Tído tá ná kei ña ni kava'a na, dá kían naá óon va choon ni kee na. Ta va'ará ná káki na, tído ndo'o níó ná tát'on k'i'o ndó'o na yá'a noo ño'ó kéj.

16 ¿Á ko ná'a ta'on ndo'ó ña kúú ndó ve'e ño'o Ndios, ta Espíritu ná ío ini ndo'?

17 Tá ío iin káa ñayuu ndúkú dánaá na ve'e ño'o Ndios, dá kían dánaá vá ñaá Ndios, chi ve'e ño'o ii

Ndios vá kúú ndo'ó.

¹⁸ O sa danda'í ndo mií ndó, chí tá ká'an dao ndo'ó ña kúú ndó na ndichí xí'ín ña ndichí ió ñayuú yó'o, dá kían va'a cháá ka kee ndó mií ndó kakuu ndó ñayuu ko ndichí xí'ín ña ndichí yó'o, dá kían kasandaá ndo kakuu ndó ñayuu ndichí noo Ndios.

¹⁹ Dá chí ña ndichí ió ñayuú yó'o kían iin ña'a ko chóon noo Ndios. Chí di'a va ká'an tuti ij Ndios: “Nátiin Ndios ta ndichí tein ña mañá kée ra.”

²⁰ Ta ká'an ta'anian di'a: “Ná'á vá Ndios ña nákani ini ta ndichí, ña kían ña ko chóon”, kaáan.

²¹ Sa'á ñoó ná dá'a ni chindaya'i ndó mií ndó sa'á ña ndíta ndó xí'ín ta yó'o o ta káa, chí ndidaá vá ña'a kúú ña'a mií ndó.

²² Sa'á ñoó Pablo, xí'ín Apolos, xí'ín Cefas, xí'ín ñayuú yó'o, xí'ín ña takí yo, xí'ín ña kuu yo, xí'ín ña ndó'o yó viti, xí'ín ña vei ndo'o yó chí noo, ndidaá kúú vá ña yó'o kúú ña'a mií ndó.

²³ Ta ndo'ó kúú kuendá Cristo, ta Cristo kúú kuendá Ndios.

4

Ká'an Pablo sa'a ndidaá ña'a ni kee na sa'á na kúú kuendá Jesús ndéi ñoo Corinto

¹ Sa'á ñoó kánian kee ndó kuendá ña kúú ndu'u ta kéchóon noo Cristo, ta ni nátiin ndu choon ña kían dána'a ndu sa'á ña ná'á iin tó'ón mií Ndios.

² Ta ndidaá na ni nátiin iin choon, miían ndúsa kánian na'a na mií ná ña kénda na choon ni nátiin na.

³ Ta ko né'e tandínii á keyíko ndo sa'á ña kéei, o á ta né'e choon ná keyíko sa'a ñá. Ta ni mií yu'u ko keyíko sa'á ña kéei.

⁴ Ta va'ará kọ nákaní kuáchì inìí noó ña kéei, tído ña yó'o kọ kónì kaa ña nì keva'i noo Ndios. Dá chí ña kényíko ndaa sa'í kúú sato'o yo Ndios.

⁵ Sa'á ñoó ná dá'a ni chindaá noo ndo keyíko ndo sa'á ña kée ni iin ñayuu. Kandati ndó nda ná nandíó koo ña kúú sato'o yo Jesús, chí noón kúú ña dánátuu ndidaá kúú ña'a nì kede'é yo. Ta dánátuu ta'ani na ña nákaní inì yo, dá natiin iin rá iin yó ñaño'ó kánian ni'ì yo noo Ndios.

⁶ Ñani, nì ka'in sa'a ndidaá ña kée miíí xí'ín ña kée Apolos sa'á ña kú'u inì ndu sa'a ndo, dá kían kande'é ndó tátò'on kì'o kée ndu, dá katì'a ndó kee ndó tátò'on kì'o sa'ándá tuti ìí Ndios choon, dá kían ná dá'a ká nì chindaya'i ndó dao ña dána'a noo ndo, ta kenóo ndó dao ká ña.

⁷ Ta, ¿ndá yoo kúú ndó, xiní ndo? Ta, ¿ndí kían ió noo ndo, ña kían kọ ní xì'o Ndios noo ndo? Nì ña'a va. Ta sa'á ña nì ni'ì óon ndóan, sa'á ñoó, ¿ndiva'a chíndaya'i ndó mií ndó ña ká'an ndo ña kọ ní ni'ì ndoan, tá dáá?

⁸ Ká'an ndó ña ni iin ña'a kọ kámaní noo ndo, ta ká'an ndó ña kuíká ndó xí'ín ña'a Ndios, ta ká'an ndó ña kúú ndó rey, ta koo ká choon kúú ndó ndu'u. Tído ndeé ká vían va'a tá miían ndaa ndisa kúú ndó rey, dá kían ni'ì ta'ani ndu ña dándáki nduú ndu'u xí'ín ndó.

⁹ Chí ká'an yu'u ña nda sata kuií nì chíkata Ndios ndu'u, ña kúú apóstol. Chí ndó'o ndu'u tátò'on kì'o ndó'o ra nì ta'anda choon ña kuu. Ta kúú ndu'u tátò'on ñayuu ná'a ñiiki ñayuú yó'o, noo ángel xí'ín noó ñayuu.

¹⁰ Ta ndu'u kúú ñayuu xixi noó ñayuu sa'á ña dána'a ndu sa'a Cristo. Tído ndo'ó, kée ndó mií ndó

ñā kúú ndó nā ndichí sa'a Cristo. Ta ndu'u kúú nā vitá ini noo ndo'ó, tído ndo'ó kúú nā ndakí. Ta ndo'ó kúú nā ió ñañó'ó, ta ndu'u kúú ra koó ñañó'ó, xiní ndo.

11 Ta nda viti nda'í kuíko ndu'u, ta nda'í íchi ini ndu, ta ko ní'i ndú dá'on kandixi ndu. Ta kéndava'a ñayuu xí'in ndú, ta ni ve'e ndu koó.

12 Ta kuitá ndu kéchóon ndu xí'in ndá'a mií ndú. Ta ká'an ndava'a ñayuu xí'in ndú, tído ndu'u, xíka ndu ña va'a sa'a ná noo Ndios. Ta kéndava'a na xí'in ndu'u, tído xí'o ndeé vá ini ndu.

13 Chínani kini na ndu'u, tído luu ká'an ndu xí'in ná. Ta ni kasandaá ndu kúú ndú tát'on xe'e, chi nda viti kée na xí'in ndu'u tát'on k'i'o kée na xí'in ña ko chóon.

14 Ta ko táai ña yó'o kosaa noo ndo, dá kaka'an noo ndo. Di'a táai ña kosaa noo ndo, chi kónij ka'an ni'inii noo ndo, chi kúú ndó tát'on de'e maníí.

15 Ta va'ará ná kakomí ndó tát'on uxí mil ta dána'a noo ndo sa'a Cristo, tído iin tó'on vá kúú tatá ndo. Ta yu'u kúú tatá ndo, chi ni daná'i noo ndo ña kúú to'on va'a ña ká'an sa'a Cristo Jesús, ta ni kandísa ndóan.

16 Sa'á ñoó seí nda'avíj noo ndo ña kee ndó tát'on k'i'o kée miíí.

17 Sa'á ñoó ni tanda'á yu'u Timoteo kosaa xi noo ndéi ndó. Ta kúú xí tát'on de'e maníí, ta ín ndaa xi xí'in sato'o yo Ndios. Ta mií xí dándusaa ini ndo tát'on k'i'o kée yu'u sa'á ña kándísai Cristo, ta k'i'o dión dána'i noo nā kúú kuendá Jesús ndéi iin rá iin xían noo yá'i kua'in.

18 Ta ió dao ndó ni kasá'á kée ndó mií ndó ña kúú ndó nā ndáya'i, chi ká'án ndó ña o sáa kai noo ndéi ndó xaan.

19 Tído yachi nda'o saai koto ni'ini ndo'ó tá k̄i'o dión kóni sato'o yo Ndios, dá ná kandaá inii á miían ndaa ndisa kómí nā chíndaya'i mií ñóó ndée Ndios, o to'on ká'an oon va na kíán.

20 Dá chí tá ñó'o yó t̄ixi ndá'a Ndios, k̄o kíán ña ka'an oon yó, chí kíán ña kómí ndisa yó ndée ná.

21 ¿Ndá kíán kóni ndo? ¿Á kóni ndo ña saai dánanii ndo'ó, o á kóni ndo ña saai xí'ín ña kú'u inii sa'a ndo, ta xí'ín ña kueé inii?

5

Sa'ándá Pablo choon noó ñayuu ñóó ña taó xóo na t̄aa ni kee kuachi kini

1 Miían ndaa ni ni'í tó'in ña tein mií ndó xaan nákaa iin t̄aa kée kuachi ka'an noo. Ta kuachi kini nda'o kíán yó'o, chí ni ñayuu k̄o ná'á Ndios k̄o kée tát̄o'on k̄i'o kée t̄aa xaan, chí kíd̄i r̄a xí'ín naná ke'én ra.

2 Tído ndo'ó kúú r̄a kúryíi ij vá ndó. ¿Á k̄o ná'á ndó ña kánian kunda'í va ini ndo, dá taó ndo t̄a kée kuachi ñóó tein mií ndó xaan?

3 Ta va'ará koó yu'u ío xí'ín ndó xaan, tído kee ndó kuendá ña ío ñaxintónií xí'ín ndó. Ta sa'á ña kíán tát̄o'on k̄i'o íoí xí'ín ndó, sa'á ñóó sa ni keyíkoí sa'á ña kini ni kee t̄aa xaan.

4 Ta xí'ín kuu sato'o yo Jesucristo nataka ndo, ta kee ndó kuendá ña íoí xí'ín ndó, ta xí'ín ndée sato'o yo Jesucristo

5 naki'o ndó t̄aa xaan noo ndá'a ña u'u, dá ná ndo'o níó rá, dá ná naá ña kini kátoó ñíi rá, dá k̄aki níó rá tá ná kasandaá kuu nandió k̄oo tuku sato'o yo Jesús kasaa nā.

⁶ Sa'á ñoó kọ vá'a ta'on ña kúryíí ndó. ¿Á kọ ná'á ta'on ndó ña xí'ín lú'u chí'í vá levadura, ta kúú dákuíta tachí vaan iin tu'u yúsa káva'a pan?

⁷ Sa'á ñoó nduvii ndo mií ndó noó kuachi kée ra, chí kián táto'on levadura dátúúán ndo'ó, dá kakuu ndó táto'on yúsa saá, ña kọ ní kí'ín tá'an xí'ín levadura. Dá chí Cristo kúú táto'on léko sa'ání na Israel kéká'ano na víko pascua, chí ni dokọ ná mií ná sa'a yo.

⁸ Sa'á ñoó ná keká'ano yó víko pascua miíá, ta ná dá'a ni kechóon yó levadura, ña kúú ña kini xí'ín ña kọ vá'a. Di'a ná kechóon yó pan, ña kọ ní kí'ín tá'an xí'ín levadura, ña kúú ña kée yó ña ndaa xí'ín ndino'o ini yo.

⁹ Ta noo iin ka tuti ni tanda'í kosaa noo ndo ká'an ña o sa káne'e tá'an ka ndo xí'ín ñayuu kée kuachi xí'ín na kọ kúú yíí ná o ñadi'í na.

¹⁰ Tído kọ kóni kaaan ña kankuei xoo ndó tein ñayuu kọ ná'á Ndios kée kuachi xí'ín na kọ kúú yíí ná o ñadi'í na, xí'ín na kátoó kakomí ña'a dao ka ñayuu, xí'ín na kí'ín kuí'íná, xí'ín na ndáño'o yoko. Dá chí miían ndúsa kánian kankuei va ndó ñayuu yó'o, dá kandeé ndó kankuei ndó tein na.

¹¹ Tído tuti ni tanda'í kosaa noo ndo ká'an ña o sa káne'e tá'an ndó xí'ín ñayuu ká'an kúú kuendá Jesús tá kée na kuachi xí'ín na kọ kúú yíí ná o ñadi'í na, o tá kátoó na kakomí ná ña'a dao ka ñayuu, o tá ndáño'o na yoko, o tá kúú ná na to'ón, o tá xí'í na, o tá kí'ín kuí'íná ná. Ta ni o sa kóo ini ndo kasá'an ndó xí'ín ná.

¹² Chí, ¿ndí kián kúú yu'u ña keyíkoj sa'á ñayuu kọ ná'taka dákuá'a xí'á? Tído, ¿á kọ ná'á ndó ña kánian keyíko yo sa'á na dákuá'a dáó xí'á?

13 Chi ñayuu kō náta_ka dákuá'a xí'á, mií Ndios kúú nā keyíko sa'a ná. Sa'a ñoó taó ndō tāa kée kuachi nákaā tein ndó xāan ná ko'on rā.

6

Ná dá'a ni ko'on ndō noó tāa né'e choon tá ndó'o ndó tandó'ó tein mií ndó

1 ¿Á kō ná'á ndó ñā tá naá iin káa ndó xí'ín iin ñani ndō, nā kúú kuendá Jesús, kō vá'a ta'on kée ndó tá ná ko'on ndō noó tāa né'e choon ñayuú yó'o ka'an kuachi ndó sa'ā ñani ndō? ¿Ndiva'a kō ká'an di'a ndó xí'ín nā kúú ñayuu Ndios, dá keyíko nā sa'ā ndō?

2 ¿Á kō ná'á ta'on ndo'ó ñā kasandaá iin kū, dá ni'í yóó, nā kúú ñayuu Ndios, ñā keyíko yo sa'ā ndidaá ñayuu? Ta sa'ā ñā ni'í ndō ñā keyíko ndō sa'ā ñayuu, sa'ā ñoó, ¿ndiva'a o kúu keyíko mií ndó tandó'ó leé ndó'o mií ndó xāan, tá dáá?

3 ¿Á kō ná'á ta'on ndo'ó ñā ndā ángel ndéi induú keyíko yó sa'ā? ¿Á kō ná'á ta'on ndó ñā ió choon ñā keyíko yo sa'ā ñā ndó'o yó ñayuú yó'o?

4 Sa'ā ñoó, tá ndó'o ndó tandó'ó ñayuú yó'o, ¿ndiva'a kua'an ndō noó rā né'e choon, tá'an rā kō sa'ání mií sa'ā ña'ā Ndios?

5 Ndidaá kúú ñā yó'o ká'in xí'ín ndó, dá ná koo cháá ñā ka'an noō ndō. ¿Á kōó ví iin tāa ndichí tein mií ndó xāan kuu keyíko sa'ā ndō tá naá iin ñani ndō xí'ín iin kā nā?

6 Chi di'a iin kúú mií ndó, nā kúú kuendá Jesús xāan, naá tá'an ndó, ta né'e tá'an ndó kua'an ndō keyíko sa'ā ndō noó tāa né'e choon, tá'an rā kō ná'á Ndios.

⁷ Ta sa'á ña naá tá'an mií ndó, sa'á ñoó ná'a ndo mií ndó ña ko ndíta ndaa ndo xí'ín Ndios. ¿Ndiva'a ko xí'o ndeé ní iní ndo tá kéndava'a na xí'ín ndó? Ta, ¿ndiva'a ko xí'o ndeé ní iní ndo tá kí'in kuí'íná ná ndo'ó?

⁸ Tído di'a kéndava'a ndó xí'ín ñani ndo, na kúu kuendá Jesús, ta kí'in kuí'íná ndó na.

⁹ ¿Á ko ná'á ta'on ndó ña o ndú'u ta'on ñayuu káni noo dándáki Ndios? O sa dándá'í ndo mií ndó, chí o ndú'u na kátoó kudí xí'ín ndi ndáa mií vá ñayuu noo ió Ndios, ni na ndáño'o yoko, ni na kídí xí'ín na ko kúu yí ná o ñadi'í na, ni ra kídí xí'ín ta xí'ín rá, ni ñá'a kídí xí'ín ñá'a xí'án,

¹⁰ ni na kuí'íná, ni na kátoó téi di'ón, ni na xí'í, ni na kiní ká'an, ni na maña o ndú'u noo dándáki Ndios.

¹¹ Ndidaá ña yó'o ni sa kee dao ndo'ó tá sata, tído sa ni nduvii va ndó noo Ndios viti, ta ni xí'o na ña koo vii ndo, ta ni kandoo vii ndo noo Ndios sa'á ña kándéé iní ndo sato'o yo Jesús, xí'ín sa'á ña ni natiin ndó Espíritu i Ndios.

Ná dá'a ni kee ndó kuachi xí'ín na ko kúu yí ndo o ñadi'í ndo

¹² Ndidaá vá ña'a kuu kee yó, tído o duú ndidaá ñá kí'o ña va'a noo yo. Ndidaá vá ña'a kuu kee yó, tído ná o kí'o yó mií yó noo ni iin ña'a ña dándákian yó.

¹³ Ni kava'a Ndios ña'a kaxío kaño'o tixió, ta ni kava'a tii yó ña kaño'o ña'a kaxío, tído ndi nduú vaan dánaa na. Tído ko ní kava'a na ñíi yo ña kían kudí yo xí'ín ndi ndáa mií vá ñayuu. Chí di'a ni kava'a na ñíi yo, dá koni kuáchí yó noo mií ná, ta mií ná kúu sato'o ñíi yo.

14 Chì Ndios, na nì danáta_ki sato'o yò Jesús, noón ta'ani kúú na dánáta_ki yó xí'ín ndée ná.

15 ¿Á kò ná'á ta'on ndó ña ñíi ndo kúú kuendá Cristo? Sa'á ñoó, ¿á kuu ko'ò xí'ín ñíi yò, ña kúú kuendá Cristo, ta dákí'in tá'an yóan xí'ín ñíi iin ñá'a díkó míi noó ɬa? Koó, o kúu ta'on.

16 ¿Á kò ná'á ta'on ndó ña tá nì naki'in tá'an ñíi iin ɬa xí'ín ñá'a díkó míi, dá kían nì nduu na iin tó'ón vá? Dá chì di'a ká'an tuti iì Ndios: “Tá nì naki'in tá'an iin ɬa xí'ín iin ñá'a, dá kían nì nduu na iin tó'ón vá.”

17 Tído na nì naki'o míi noo sato'o yò Jesús, dión nì nduu na iin tó'ón xí'ín ná.

18 Kuino kíi ndo noó ña kátoó ndo kudì ndo xí'ín na kò kúú ñadi'í ndo o yíi ndo. Dá chì ndidaá ka kuachi kée ñayuu kò kían kuachi kée na xí'ín ñíi míi ná, tído na kée kuachi xí'ín na kò kúú yíi ná o ñadi'í na, noón kúú na yá'a kée kuachi xí'ín ñíi míi ná.

19 Chì, ¿á kò ná'á ta'on ndó ña yikí koño ndo kúú ve'e ño'o noo ió Espíritu iì Ndios? Chì ió na ini ndo, chì nì natiin ndó na noo Ndios. Sa'á ñoó kò dándáki ka ndo míi ndó,

20 dá chì ya'i nda'o nì chiya'i Ndios sa'a ndo. Sa'á ñoó keká'ano ndó Ndios xí'ín ñíi ndo, xí'ín espíritu ndo, chì ña'a Ndios kían.

7

Ká'an ni'ini Pablo noó ñayuu sa'a ndí kían kee na tá tánda'a ná

1 Ta viti kían ko'in kasto'in xí'ín ndó sa'á ña nì ndato'ón ndó yu'u noo tuti nì tanda'á ndó nì kíi nooí, á ña va'a cháá ka kían ña ná o tánda'a ɬa xí'ín ñá'a.

² Tído sa'á ña ióan ya'a ndó kee ndó kuachi xí'ín na kọ kúú yí ndo o ñadi'í ndo, sa'á ñoó va'a cháá ka ná koo ñadi'í iin rá iin ndó, ta iin rá iin na ñá'a ná koo yí ná.

³ Ta iin rá iin taá kánian kudi nduú ra xí'ín ñadi'í ra, ta kị'o dión ta'ani kánian kee na ñá'a xí'ín yí ná.

⁴ Dá chi na ñá'a kọ dándáki ka na ñi ná, ndaá yí vá ná kúú ra dándáki ñáá. Ta ni taá kọ dándáki ka ñi rá, ndaá ñadi'í ra kúú na dándáki ñáá.

⁵ Sa'á ñoó o sa kádí'inda ndo ñi ndo noo yí ndo o noo ñadi'í ndo. Tído tá ni kandoo mií ndó ña o náki'ín tá'an ndó dao kuu, chi kóni ndo kane'e ií ndo ka'an ndo xí'ín Ndios, dá kían kuu va kee ndó dión. Tído ndi'i daá, naki'ín tá'an nduú tuku ndó, chi oon ni ví o kị'o ndeé iní ndo, ta kexíxi ña u'u xí'ín ndó, dá ya'a ndó kee ndó kuachi xí'ín iin ka na.

⁶ Ndidaá ña'a ká'in xí'ín ndó yó'o kían ká'an ni'inii noo ndo, tído kọ kúú ta'an vaan choon sa'ándái noo ndo.

⁷ Ká'an yu'u ña va'a cháá ka kían ña ná kandeí mií ndidaá taá tát'on kị'o ió mií yu'u. Tído díin díin va ña'a ni ni'í tá'í iin rá iin ñayuu noo Ndios, chi ió dao na ni ni'í tá'í ña kị'o ndeé iní na kandeí mií ná, ta ió ta'ani dao na ni ni'í tá'í ña tanda'a ná.

⁸ Ta ña yó'o ká'an yu'u xí'ín takuáchí táki, xí'ín na kuáan ña iin ña va'a kían ña ná kandeí mií ná tát'on kị'o kée yu'u.

⁹ Tído tá kọ xí'o ndeé iní na chituu na ña kóni ñi ná, dá kían va'a cháá ka ná tanda'a ná. Dá chi va'a cháá ka ña tanda'a ná o duú kaan ndo'o níó ná koni na iin taá o iin ñá'a.

¹⁰ Ta noo ndo'ó, na ni tandá'a, sa'ándái choon noo ndo, tído kọ kían choon ni ndaki ñaxintóní,

chì choon sa'ándá mií sato'o yò Ndios nooí kíán, ña ndo'ó, na ñá'a, o sa dánkoo ndó yíi ndo.

11 Tído tá sa ñi dánkoo iin ñá'a yíian, dá kíán ná dá'a ni tanda'an xí'ín iin ka ta. Va'a cháá ka ná ndaka ña maní noo sátá'an iin rá iin na, dá naki'in tá'an tuku na kandeí na. Ta ndo'ó, ra ta xaan, o sa dánkoo ndó ñadi'í ndo.

12 Ta ío ña ka'in xí'ín dao ka ndo, va'ará ko ká'an sato'o yò Ndios sa'án. Tá ío iin káa ñani yò, ta ko kándisa ñadi'í ra Jesús, tído íoan ña koo iian xí'ín rá, dá kíán ná dá'a ni dánkoo ñaá rá.

13 Tá ío iin káa na ñá'a kándisa Jesús, ta ko kándisa yíi ná, tído tá ío ra ña koo ií rá xí'ín ná, dá kíán ná dá'a ni dánkoo ñaá ná.

14 Chì iin yíi ko kándisa Jesús, ndé'é va'a ñaá Ndios sa'á ña kándisa ñadi'í ra. Ta iin ñadi'í ko kándisa Jesús, ndé'é va'a ñaá Ndios sa'á ña kándisa yíian. Chì tá ko kíán dión, dá kíán kandoo kini de'e na noo Ndios, tído viti kúú xí takuá chí vii noo ná.

15 Tído tá ká'án yíi ndo o ñadi'í ndo, na ko kándisa Jesús, ña dánkoo na ndo'ó, dá kíán konó ndó ná kee na dión. Chì ñi ndaxi ndo noo ña ñi tandá'a ndó xí'ín ná tá ndó'o ndó dión. Chì ñi ñakana Ndios ndo'ó ña kíán kandeí va'a ndó.

16 Chì ndo'ó, na ñá'a xaan, ¿xíni á kandeé ndó xí'ín yíi ndo, dá nduu ra kuendá Jesús? Ta ndo'ó, ta kúú yíi, ¿xíni á kandeé ndó xí'ín ñadi'í ndo, dá nduu na kuendá Jesús?

17 Tído iin rá iin ndó kánian koo tát'o on ñi xi'o mií sato'o yò Ndios koo ndó tá ñi ñakana ñaá ná xoo mií ná. Ta ña yó'o kíán dána'i noo ndidaá kúú na kúú kuendá Jesús iin iin xíán noo xíonooi.

18 Sa'á ñoó, ¿á sa ñi ta'anda ñíi ndo tá ñi ñakana ñaa Ndios? Dá kían nda dión koo va ndó. ¿Á ió dao ndó ko ñá'a ta'anda ñíi tá ñi ñakana ñaa Ndios? Dá kían ná dá'a ni ka'anda ndoán.

19 Dá chi ña ta'anda ñíi yo xí'in ña ko ní ta'anda ña, ni iin ña'a ko ndáya'i ña, dá chi ña ndáya'i noo Ndios kían kee yó choon sa'ándá na.

20 Sa'á ñoó kánian koo iñ ndo tát'on k'i'o ndaa ndó tá ñi ñakana ñaa Ndios xoo mií ná.

21 ¿Á ñi sa ño'o ndó tixi ndá'a iin sato'o tá ñi kana ñaa Ndios? Ná dá'a ni nakani ini ndo. Tído tá ió tandeé ini ña kankuei ndó tixi ndá'a sato'o ndo, dá kían cho'on ini ndo yaa ndo.

22 Chi ndo'ó, na sa ño'o tixi ndá'a iin sato'o tá ñi kana ñaa Ndios, ndo'ó kúu na ñi taó xoo Ndios tixi ndá'a kuachi, dá nono ndo kee ndó ña kóni na. Ta ndo'ó, na ko ní sá ño'o tixi ndá'a iin sato'o tá ñi ñakana ñaa Ndios, viti kían ñi ndu'u ndó tixi ndá'a Cristo, dá koni kuáchí ndó noo ná.

23 Ya'i nda'o ñi chiya'i Ndios sa'a ndo, sa'á ñoó ná dá'a ni nach'i'i ndó mií ndó tixi ndá'a ni iin tó'ón ñayuu.

24 Sa'á ñoó, ñani, tát'on ñi sa ndaa iin rá iin ndó tá ñi ñakana ñaa Ndios, k'i'o dión iñ ní koo ndó noo ná.

25 Ta viti ko'in ka'in cháá xí'in ndó sa'á na takí, va'ará ko ta'ón choon ní ñí'í noo sato'o yo Ndios kían. Tído ká'an ni'inii noo ndo tát'on k'i'o ká'an mií yu'u kúu ña va'a, chi sa'á ña kú'u ini sato'o yo Ndios sa'í, sa'á ñoó kúu iin taa ká'an ña ndaa.

26 Ta sa'á ña ndéi yó tiempo u'u nda'o, sa'á ñoó ká'an yu'u ña va'a cháá ka ná kandeí mií ndó, ta taa, tát'on k'i'o ndéi ndó.

27 Tá ió ñadi'í ndo, o sa dánkoo ñaá ndó. Ta tá koó ñadi'í ndo, o sa ndí'i ini ndo tanda'a ndo.

28 Tído tá ná tanda'a ndo, ko ta'ón kuachi kíán. Ta dión ta'ani takuáchí di'í tákí, ko ta'ón kuachi kíán tá ná tanda'a xí. Tído na tánda'a, kasá'á ndo'o níó ná, ta ko kóni yu'u ña ndo'o ndó dión.

29 Tído ña yó'o ká'an yu'u xí'ín ndó, chi ndadá cháá vá tiempo kámani noo yo. Sa'á ñoó ndo'ó, na ió ñadi'í, kee ndó kuendá ña koó ná ió, ta ndí'i cháá ka ini ndo sa'a Ndios.

30 Ta ndo'ó, na kúnda'í ini, kee ndó kuendá ña ko kúnda'í ini ndo. Ta ndo'ó, na ndéi dii, kee ndó kuendá ña ko ndéi dii ndo. Ta ndo'ó, na xín, kee ndó kuendá ña koó ña'a ní xín ndó.

31 Ta ndo'ó, na kéchóon ña'a ió ñayuú yó'o, ná dá'a ni ndí'i ini ndo sa'an. Dá chi ñayuú ndéi yó viti naá váán xí'ín ndidaá kúú ña'a ió nooán.

32 Chi ña kóni yu'u kíán ña ná dá'a ni nakani téi ini ndo sa'á ña'a ió ñayuú yó'o. Chi na ko ñá'a tanda'a, ndí'i cháá ka ini na sa'á ña'a sato'o yo Ndios, chi ndúkú ná ña nata'an ini sato'o yo koni ñaá ná.

33 Tído ta na ni tandá'a, nákani cháá ka ini ra sa'á ña ió ñayuú yó'o, chi ndúkú rá ña nata'an ini ñadi'í ra koni ñaáán.

34 Ta dión ta'ani ko kúú nóo ta'an vaan xí'ín ñá'a ió yí xí'ín ñá'a koó yí. Chi ñá'a koó yí, ndí'i inian sa'á ña'a sato'o yo Ndios, chi ndúkúán ña kandoo vii ñiñan, xí'ín níman noo Ndios. Tído di'a ñá'a ió yí, ndí'i cháá ka inian sa'á ña ió ñayuú yó'o, chi ndúkúán ña nata'an ini yíñan koni ñaá rá.

35 Ká'in ndidaá ña yó'o xí'ín ndó, dá ni'í ini cháá ka ndo ndi kee ndó. Ta ko ká'in sa'a ña sa'á ña kóni chituui ndo'ó. Ña kóni yu'u kíán kee ndó ña

va'a xí'ín ña ndísá'ano, dá kían ni iin tó'ón ña'a ná o kétéin noo ndo kee ndó ña kóni Ndios.

³⁶ Tá ió iin káa ndó ká'án ña ko vá'a ta'on ña kuyatá de'e di'í tákí ndo, ta ká'án ndó ña kánian tanda'a xí, dá kían kuu kị'o ndó ña tanda'a xí, chi ko ta'ón kuachi kían.

³⁷ Tído ndo'ó, na ió ini ña ná o tánda'a de'e di'í ndo, ta o duú ña mián ndúsa kían ña tanda'a xí, ta nónó noo ndo kee ndó ña kían kóni mií ndó, tá sa ni chikaa ini ndo ña o tánda'a ta'ón de'e di'í tákí ndo, dá kían va'a va kée ndó.

³⁸ Sa'á ñoó, na xí'o de'e di'í na tanda'a xí, va'a kée na, ta na ko xí'o xi tanda'a xí, va'a cháá ka kée na.

³⁹ Ta iin ña'a ió yíi, ni kato tá'an xí'ín yíian noo ley xian nani takí ra ió ra. Tído tá ni xil'i yíian, dá kían ni nono nooan tanda'an xí'ín ndi ndáa ta kóni mián, tído ta kándisa sato'o yo Cristo ná kakuu ra.

⁴⁰ Tído kaá yu'u ña va'a cháá ka ví keeán tá ná o tánda'a tukuán, ta ká'ín ña kị'o dión ta'ani kóni Espiritu i Ndios.

8

Ká'an ni'ini Pablo sa'á koño dóko ñayuu ko ná'a Ndios noo yoko

¹ Viti, dá kua'in kasto'in xí'ín ndó sa'á koño dóko ñayuu noo yoko. Sa kátóni va'a ini yo sa'á ña yó'o. Tído sa'á ña kátóni ini yo, ña yó'o kedaá xí'á, sa'á ñoó kúryí yó. Tído tá kú'u ndisa ini yo sa'á ñayuu xí'ín yó, dá dákuá'ano yó na xí'ín to'on Ndios.

² Tá ió iin káa ndó ká'án ña ná'a nda'o ndó sa'a iin ña'a, di'a ko ná'a ndó sa'án táto'on kị'o kánian kana'á ndó.

³ Tído tá miían ndaa kóni yō Ndios, dá kíān ná'á ná yó, ña kúú yó ñayuu na.

⁴ Ta viti ko'in ka'in xí'in ndó sa'á ña dóko ñayuu noó yoko. Ná'á yó ña ko ta'ón ña'a ndáya'i yoko ndéi ñayuu yó'o, chí koó ka iin ka ndios, sava'a iin tó'ón dinj vá kúú Ndios.

⁵ Va'ará ká'an ñayuu ña ndéi dao ka ndios induú o noño'o yó'o, chí kaá na ña kua'á nda'o ndios xí'in kua'á nda'o sato'o ndéi,

⁶ tído noo yóo, iin tó'ón dinj vá kúú Ndios, na kúú tatá yō, na ni kava'a ndidaá kúú ña'a, ta noon kúú na xí'o ña takí yō kéchóon yó noo ná. Ta iin tó'ón dinj ta'ani kúú sato'o yō Jesucristo. Ta xí'in ndá'a míi ná ió ndidaá kúú ña'a, ta míi ná kedaá xí'á, dá takí yō ndéi yó.

⁷ Tído o duú ndidaá ñayuu kátóni ini sa'á ña yó'o. Dá chí ñó'o dao ñayuu tein ndó, nda kuálí ná ni kasá'á ná ndáño'o na yoko. Sa'á ñoó tá seí na koño ni doko ñayuu noó yoko, ká'an ná ña sa ndáño'o ta'ani na yoko ñoó, ta kasá'á ná nákani kuáchi ini na sa'á ña ko ná'á va'a na, ta ká'an ná ña ni yako na noo Ndios.

⁸ Sa ná'á vá yó ña o duú ña'a seí yō kedaá xí'in yó, dá kandoo va'a yó noo Ndios. Dá chí ko kúú yó ñayuu ndáya'i cháá ka noo ná sa'á ña seí yō dao ña'a, ta ni o kandoo nóo yó noo ná sa'á ña ko seí yō dao ka ña'a.

⁹ Tído kaon koo ndó, chí va'ará kuu keí ndoán, tído ná dá'a ni ki'o ndó ña kíān kuei dao na kómani kua'ano xí'in to'on Ndios noó kuáchi sa'á ña seí ndoán.

¹⁰ Dá chí tá ná koni na iin kaa ndo'ó, na sa ná'á sa'á ña yó'o, ta ió ndo seí ndo koño ini ve'e noo

ndáño'o ñayuu yoko, dá kían ka'án ta'ani na keí ná ña, va'ará nákaní kuáchi ini na keí náan. ¿Á kó ná'á ta'on ndó ña sa'á ña kée ndó dión, sa'á ñoó xíno ini na keí ná koño ni doko ñayuu noó yoko?

¹¹ Ta sa'á ña ná'á va'a ndó ña kó ta'ón kuachi kían keí ndó koño ñoó, sa'á ñoó dátuu ndó ñani ndo, na kó ñá'a kua'ano xí'in to'on Ndios, na ni chiya'i Cristo sa'a.

¹² Ta sa'á ña yá'a ndó kée ndó kuachi noo ñani ndo, ta sa'á ña xí'o ndó ña xíno ini na kée na ña ká'án ná kúu kuachi, sa'á ñoó yá'a ndó kée ndó kuachi noo mií Cristo.

¹³ Sa'á ñoó tá ña'a seí yu'u kedaá xí'in ñanij, dá kwei na noó kuachi, dá kían ni iin kuu ka ná o kaxíi koño, dá kían ná dá'a ni ya'a ñanij kee na kuachi sa'a yú'u.

9

Ká'an Pablo ña kúu ná iin apóstol

¹ ¿Á kó ná'á ta'on ndó ña kúu iin apóstol, na né'e to'on Jesús? ¿Á kó ná'á ta'on ndó ña kuu kee yu'u ndidaá ña'a kée dao ka apóstol? ¿Á kó ná'á ta'on ndó ña ni xini ta'ani yu'u Jesús, na kúu sato'o yo? ¿Á kó ná'á ta'on ndó ña ni nduu ndó kuendá Jesús sa'á ña kéei choon ni xí'o sato'o yo nooí?

² Ndá ndi kuu kó kándía dao ka ñayuu ña miían ndaa kuiti kúu yu'u apóstol Jesús, tído ndo'ó kúu na kánian nakoni ndo yu'u. Ta sa'á ña kúu ndó kuendá sato'o yo Jesús, ñoó kían ná'a ña kúu iin apóstol.

³ Ta ña yó'o kúu to'on ká'in xí'in ndo'ó, na kána'á xí'ín ndéi xaan:

4 ¿Á kō ta'ón íchi ndú ña k̄i'o ndó ña'a kasá'an ndu, ña k̄i'o ndó ña'a ko'o ndú?

5 ¿Á kō ta'ón íchi ndú ña kandaka ndu na ña'a kándisa Jesús kakuu ñadi'í ndu, ta kanoo nduú na xí'ín ndú, táto'on k̄i'o kée dao ka na kúu apóstol, xí'ín ñani sato'o yō Jesús, xí'ín Cefas?

6 ¿Á sava'a yu'u xí'ín Bernabé kúu na kánian koto mií xí'ín choon kée ndu?

7 Ta, ¿ndi káa iin soldado xíto mií xí'ín dijón mií rá? Ta, ¿ndi káa iin taa xíti uva, ta kō seí ra uva kána noñó'o rá? Ta, ¿ndi káa iin taa ndáka léko, ta kō xí'i ra lechí ri?

8 ¿Á ká'an ndó ña nákanini ini taa ká'ín xí'ín ndó? ¿Á kō ná'a ta'on ndó ña dión ta'ani ká'an ley Moisés?

9 Dá chi ley Moisés kían kaá di'a: “O sa taán ndo ñóno yú'u chee tá sádi ri tirió, dá ná kuu keí rí chááán.” ¿Á ká'an ndó ña ndí'i ini Ndios sava'a sa'á chee?

10 O, ¿á ni taa ta'ani na to'on yó'o sa'a yóo? Sa'a yóo ni taa naan. Ta dión ni na xíti, ió tandeé iní noo ná ña natiin na ña'a noñó'o ni xiti na, ta na sádi tirió, ió ta'ani tandeé iní noo ná ña natiin na ña'a noo ni nduvii na ñoó.

11 Ndu'u kúu na ni chi'i tata ña kúu to'on Ndios ini níto ndo, sa'á ñoó, ¿á kakian iin ña dáta'án nda'o ndu'u ndo'ó ña natiin ndu'u cháa ña xínño'ó ndú noo ndo?

12 Tá dao ka va taa kúu ra nátiin ña xíto ndó ra, ta va'a cháa ka ví kánian kee ndó xí'ín ndu'u.

Ta va'ará ió íchi ndú ña koto ñaá ndó, tído kō kéchón ta'on ndu'an. Di'a xí'o ndeé vá iní ndu

noó ndidaá ña'a, dá kían ni iin ña'a ná o kétéin noó ñayuu ña kandísa na to'on va'a sa'a Cristo Jesús.

13 ¿Á ko ná'á ta'on ndó ña taa kéchóon noo Ndios ini ve'e ño'o ká'ano seí ra ña ñó'o ini ve'e ñoó, ta ra dóko kítí noo náa seí ra cháá koño ri?

14 Dión ta'ani ni sa'anda sato'o yo Jesús choon ña na xionoo dána'a to'on va'a sa'a ná, kánian kataki na noo choon kée na.

15 Tído yu'u, ni iin kuu ta'ón ko ní ka'in xí'in ndó ña koto ndó yu'u, ta ni ko táai to'on yó'o kosaa noo ndo sa'á ña kónij ña koto ndó yu'u. Va'a kaan ná kuu di'a yu'u, o duú ka ña ditá ndó ña náta'an inij sa'á ña ko kí'in ya'i noo ndo.

16 Tá dána'a yu'u to'on va'a sa'a Jesús, dá kían ko kánian chindaya'i yu'u mií, dá chi ni ta'anda choon noo ña dión kánian keei. Nda'í yu'u tá ná o dána'i to'on va'a yó'o.

17 Tá ni chikaá ini mií yu'u keei choon yó'o, dá kían kuu va natiin ya'i noo ndo. Tído o duú mií yu'u ní chíkaá inij keei ña, dá chi choon ni ta'anda noo vá yu'u kíán.

18 Ta, ¿ndí kían va'a nátiin yu'u, tá dáá? Ña va'a nátiin yu'u kían náta'an inij sa'á ña ko kí'in ya'avii noo ndo dána'i to'on va'a sa'a Cristo Jesús. Chi ko kónij dándi'i inij ndo'ó kee ndó ña kánian kee ndó xí'ín sa'á ña dána'i to'on va'a sa'a Jesús.

19 Ta sa'á ña ko nákaai tixi ndá'a ni iin tó'ón ñayuu, sa'á ñoó nónói k'oi mií konkuáchíi noo ndidaá kúu ñayuu, dá kían kandeéi ña kandísa kua'a cháá ka na to'on va'a sa'a Jesús.

20 Sa'á ñoó, tá nákaai tein na kúu na Israel, dá kéei mií kúu iin na Israel, dá kandeéi kandísa na Jesús. Chi tá nákaai tein na ñó'o tixi ndá'a ley Moisés, ta

va'ará ko nákaai tixi ndá'a ley ñóó, tído kéei miíí ña nákaai tixi ndá'án, dá kandeéí kandísa na Jesús.

²¹ Ta dión ta'ani kée yu'u tá nákaai tein ñayuu ko ñó'o tixi ndá'a ley Moisés, chí kée yu'u miíí ña ko nákaai tixi ndá'a ley. Tído ko kóni kaaan ña ko seídó'o yu'u choon sa'ándá ley Ndios, chí nákaai tixi ndá'a Cristo. Dión kéei, dá kandísa na ko ñó'o tixi ndá'a ley to'on va'a Jesús.

²² Tá nákaai tein na ko ñá'a kua'ano xí'ín to'on Ndios, dá kían kée yu'u miíí tátó'on kí'o kúú mií ná, dá kandeéí kua'ano na xí'ín to'on Ndios. Ta daá kuití vá kée yu'u miíí tátó'on kí'o kúú iin rá iin ñayuu, dá kandeéí káki dao na noó kuachi na.

²³ Ndidaá kúú ña yó'o kée yu'u, dá naka'ani cháá ka to'on va'a sa'a Jesús kua'an, ta kí'o dión kandeé ta'ani yu'u ni'í ña kúú ña va'a sa'á to'on va'a yó'o.

²⁴ ¿Á ko ná'a ta'on ndó ndi ndó'o ta taxí tá'an? Chí ndidaá vá rá ndúndéé taxí tá'an, tído iin tó'ón vá kúú rá kándéé. Ta kí'o dión ta'ani ndundéé ndó kuita ndaa ndo xí'ín to'on Ndios, dá kandeé ndó ni'i ndo ña kánian natiin ndó.

²⁵ Ta kí'o dión ta'ani ndó'o ra ko'on chídáó tá'an, chí ndí'i nda'o ini ra kénduu ra mií rá, dá kandeé rá ni'i rá iin corona, ña naá óon. Tído yóó kúú na ndí'i ini kuita ndaa xí'ín Ndios, dá ni'i yo iin corona, ña ni iin kuu o naá.

²⁶ Sa'á ñóó kí'o dión ndaa kánkonoí íchi Ndios, chí ko kánkono naá ta'on yu'u. Ta kí'o dión ta'ani kéei tá naái xí'ín ña kini, chí ko kéei tátó'on kée na dáko'on yikí noo táchi.

²⁷ Di'a dándó'o yu'u ñííí, ta kéndúsai xí'án, dá kandeéí ña keean ña kóni Ndios. Dá chí tá koó, dá kían, va'ará ni daná'i noo dao ka ñayuu, oon ni ví

o kándeéi kasandaái nda noó ni chiná'a Ndios.

10

Kuino kí ndo noó yoko, ta o sa kándaño'o ndóan

¹ Tído ko kóni, ñani, ña nandodó ndo ña ni xika na sá'ano ñoo ndu'u tixi kátí viko, ña ni kasto'on xí'ín ná noo kánian ko'on na. Ta ndidaá vá ná ni chika'anda me'í taño'o naní Taño'o Kua'á.

² Ta k'i'o dión ni ndu'u na tixi ndá'a Moisés, chi kían táto'on ni sodo ndúta ná xí'ín viko ñoo xí'ín taño'o ñoo.

³ Ta ndidaá ná ni sei ña'a ni tanda'á Ndios ni kii induú,

⁴ ta ndidaá ta'ani na ni xi'i takuí ni xi'o Ndios noo ná. Chi ni xi'i na takuí ni kana ndika káo, ta káo ñoo kúu Cristo.

⁵ Tído kua'á nda'o ñayuu ñoo ko ní náta'an ini Ndios koni na. Sa'á ñoo ni kandoo yiki koño na noño'o ichi ñoo.

⁶ Ndidaá kúu ña yó'o kían kásto'on xí'ín yó ña ko vá'a ta'on ña kato'o yo kee yó ña kini táto'on k'i'o ni kee ñayuu ñoo.

⁷ Sa'á ñoo o sa kándaño'o ndó yoko táto'on ni kee dao ñayuu ñoo, chi di'a ká'an tuti ii Ndios: “Ni sa ndei na ni sasá'an na, ta ni xi'i na, dá ni ndakuei na ni sa ndei dii ná noó yoko.”

⁸ Ta ná dá'a ni kee yó kuachi xí'ín na ko kúu ñadi'i yo o yí yo táto'on k'i'o ni kee dao ñayuu ñoo. Chi sa'á ña ni kee na dión, sa'á ñoo iin kuu ni xi'i oko oni mi na ni kee Ndios.

⁹ Ta ná o sa kóo ini yo korndodó yó sato'o yo Ndios táto'on k'i'o ni kee dao ñayuu ñoo, chi sa'á ña

n̄i kee na dión, sa'á ñoó kua'a ná n̄i xi'i tá n̄i seí ñaa koq.

¹⁰ Ta ni o sa ká'an kuachi ndó noo Ndios tát'o'n n̄i kee dao ñayuu ñoó, chi sa'á ña n̄i kee na dión, sa'á ñoó kua'a ná n̄i xi'i n̄i kee iin ángel né'e choon sa'áni ñayuu.

¹¹ Ndidaá kúú ña yó'o kían n̄i ndo'o ñayuu ñoó, ta kást'o'an xí'in yó ña ná o sa kóo ini yo kee yó dión, ta n̄i taa naan noo tuti īi Ndios ka'an ni'inian noo yóó, na n̄i kasandaá ndéi tiempo noo ndí'i.

¹² Sa'á ñoó ndi ndaa ndó ká'an ña ndíta toon ndó xí'in Ndios, dá kían kanda ndo mií ndó, dá ná dá'a ni kuei ndó noo kuachi.

¹³ Kana'á ndó ña tandó'ó ndó'o ndó, iin nóó vá kúúan xí'in tandó'ó ndó'o ndidaá ka ñayuu. Tído iin na ndaa kúú Ndios, chi o kónó ta'on na ña ndo'o cháa ka níq ndo noo ña o k̄i'o ndeé iní ndo. Dá chi di'a k̄i'o va Ndios tandeé iní noo ndo, dá kandeé ndó kankuei ndó noo tandó'ó xirndodó ñaa.

¹⁴ Sa'á ñoó, na man̄i mīi, taó xóo ndó mií ndó noo ña kúú yoko, o sa kandaño'o ndóan.

¹⁵ Ká'in xí'in ndó tát'o'n ká'in xí'in na kandaa ini. Sa'á ñoó taó kuendá va'a ndó sa'á ña ká'in xí'in ndó yó'o.

¹⁶ Tá xí'i yó copa ndutá uva, ndirá dándáki ña n̄i kee Cristo Jesús sa'a yo, ta náki'o yó ndivé'e noo Ndios sa'a ra, ¿á ko ná'á ta'on ndó ña iin n̄i nduu yó xí'in Cristo n̄i kee nīi ná? Ta tá dákuáchi yó pan, dá seí yoán, ¿á ko ná'á ta'on ndó ña iin n̄i nduu yó xí'in Cristo sa'á ña n̄i xi'o na yikí koño na n̄i xi'an sa'a yo?

¹⁷ Va'ará kua'a vá kúú yó, tído iin tó'ón vá pan seí yo, sa'á ñoó iin tó'ón vá n̄i nduu yó, chi iin tó'ón vá pan seí ndi'i yó.

18 Kande'é ndó tátò'on kée nà Israel. Chì seí nà cháá koño kítì dókò ná noo náa, ta, ¿á kò ná'á ta'on ndó ña kíán tátò'on iin nì nduu na xí'ín noo náa ñoó?

19 Ta sa'á ña ká'ín dión xí'ín ndó, ¿á kóni kaa ña ndáya'i yokò, o ndáya'i ña dókò ñayuu nooán?

20 Koó, chì ña ká'ín xí'ín ndó kóni kaa ña tá dókò ñayuu kò ná'á Ndios koño noo yokò, noo ña u'ụ va dókò náan, ta o duú noo Ndios takí, ta kò kóni ta'on yu'ụ ña iin nduu ndó xí'ín ña u'ụ.

21 Sa'á ñoó kò kánian ko'o ndó copa kuendá Cristo, nà kúú sato'o yo, ta ko'o ta'ani ndó copa kuendá ña u'ụ, chì kò kánian kasá'an ndó mesa kuendá sato'o yo Cristo, ta iin nduu ndó xí'ín ná, ta kasá'an ta'ani ndó noo mesa kuendá ña u'ụ, ta iin nduu ndó xí'án.

22 ¿Á kò ná'á ta'on ndó ña dár'u'ụ yo sato'o yo noo ña kuión nà tá kée yó dión? ¿Á ká'án ndó ña ndakí cháá ka yo o duú Ndios?

Ná dá'a ni ndukú yó ña va'a mií yó. Di'a nandukú yó ña va'a dao ka nà

23 Ndidaá vá ña'a kuu kee yó, tído o duú ndidaá ñá kì'o ña va'a noo yo. Ndidaá vá ña'a kuu kee yó, tído o duú ndidaá ñá dákuá'ano dao ka ñayuu.

24 O sa ndí'i ini ndo sa'á ña kandeí va'a ndó, di'a ndí'i ini ndo ña ná kandeí va'a dao ka ñayuu.

25 Ta ndi ndáa mií koño kúya'i noo díkó náan, kuu va keí ndoán. Ta o sa ndátò'ón ndó ndeí nì kixian, dá kían ná dá'a ni kasá'á nakani kuáchì ini ndo.

26 Dá chì ña'a sato'o yo Ndios kúú iin ní kúú vá ñayúú yó'o xí'ín ndidaá kúú ña'a ió nooán.

27 Tá nì kana iin nà kò ná'á Ndios ndo'ó ña ko'on ndo ve'e na kasá'an ndó xí'ín ná, ta tá ká'án ndó

ko'on ndo, kei ni ndo ndidaa kuu ña xí'o na noo ndo. O sa ndátó'ón ndo ndei ni kixian, dá kían ná dá'a ni kasá'á nakani kuáchi ini ndo.

²⁸ Tído tá ió iin na kaa xí'ín ndó: “Koño ni doko ná noó yoko vá kían xaan”, dá kían ná dá'a ni kei ndoán sa'á ña ni ka'an na dión, dá ná o nákaní kuáchi ini na kande'é ná ndo'ó, dá chi ña'a sato'oyo Ndios kuu iin ní kuu vá ñayuu yó'o xí'ín ndidaa kuu ña'a ió nooán.

²⁹ Ká'in sa'á ña nákaní ini dao ka na, o duú sa'á ña nákaní ini mií ndó.

Tído ndá ndi kuu kaa ndo xí'ín: “¿Ndiva'a kánian chituu yu'u ña nónoí kee sa'á ña nákaní kuáchi ini dao ka ñayuu?”

³⁰ Chi tá ni nakí'o va yu'u ndivé'e noo Ndios sa'á ña'a saxí, ¿ndiva'a ká'an u'u ñayuu sa'í, ta sa ni nakí'o yu'u ndivé'e noo Ndios sa'án?”

³¹ Sa'á ñoó tá sásá'an ndó, o xí'i ndó, o kée ndó dao ka ña'a, daá kuití kee ndoán sa'a Ndios, dá ná natiin na ñañó'ó.

³² O sa kákuu ndó tátó'on iin ña'a kétéin noó ñayuu, dá kuei na noó kuáchi, á mií ná kuu ná na ñoo Israel, o á mií ná ko kuu ná na ñoo Israel, o á mií ná kuu ná kuendá Cristo.

³³ Chi dión kée mií yu'u noo ndidaa ña kéei, chi ndúkúí ña nata'an ini ndidaa ñayuu, chi ko kée yu'u sa'a mií, di'a kée yu'u sa'a dao ka na, dá ni'i ná ña káki na noó kuáchi na.

11

¹ Sa'á ñoó kee ndó tátó'on kí'o kée yu'u, chi yu'u kuu na kée tátó'on kí'o kée Cristo.

Ki'o di'a kee ndó tá nátaaka ndo dákuá'a ndó to'on Ndios

² Nákonì yu'u ndo'ó, ñani, dá chî ndíko'on ini ndo yu'u, ta kée ndó táto'on kî'o nî daná'î noo ndo.

³ Tído kónijî ña kían kandaá ini ndo ña Cristo kúú dinî noo ndidaá kúú ɬaa. Ta dión ta'ani ndó'o ɬaa, chî mií rá kúú dinî noo ñadi'í ra, ta Ndios kúú dinî noo Cristo.

⁴ Sa'á ñoó ndi ndáa mií vá ɬaa ká'an xí'ín Ndios o dána'a ra to'on nî xî'o Ndios noo rá tá kánóo iin ña'a dinî rá, dá kían ko xí'o ta'on ra ñaño'ó noo na kúú dinî noo rá.

⁵ Tído ndi ndáa mií vá na ñá'a ká'an xí'ín Ndios o dána'a na to'on nî xî'o Ndios noo ná tá ko dáda'i na dinî ná, dá kían ko xí'o ta'on na ñaño'ó noo ra kúú dinî noo ná, ta kéeá kuendá táto'on nî datá tá'í dinî ná.

⁶ Chî tá ko kóni na ñá'a dáda'i na dinî ná, dá kían va'a kaan ná datá tá'í naan. Tído tá kían iin ña ka'an noo noo ná, dá kían va'a kaan ná dáda'i naan.

⁷ Ta ni iin ɬaa ko kánian dáda'i dinî rá, dá chî káa ra táto'on kî'o káa mií Ndios, ta nátiin na ñaño'ó noo rá. Tído ɬa ɬaa kúú ra nátiin ñaño'ó noo na ñá'a,

⁸ dá chî ko ní kí'in Ndios lásá yika na ñá'a, dá kava'a na ɬaa, di'a lásá yika ɬaa nî kí'in na, dá nî kava'a na na ñá'a.

⁹ Ta ko ní kava'a Ndios ɬaa sa'á na ñá'a, di'a nî kava'a na na ñá'a sa'á ɬaa, dá chindeé ñaa.

¹⁰ Sa'á ñoó miían ndúsa kánian kada'i dinî na ñá'a, dá ná'a na ña nákaa na tixi ndá'a yíi ná, chî ndé'é káxí ñaa ángel ndéi induú.

¹¹ Tído mií sato'o yo Ndios kúú na nî saki ña o kúu ta'on koo iin ɬaa tá koó iin ñá'a, ta o kúu ta'on koo iin ñá'a tá koó iin ɬaa,

¹² dá chî va'ará nî kí'in Ndios lásá yika ɬaa, dá nî kava'a na ñá'a, tído tixi na ñá'a ta'ani káki ɬaa. Tído

ndidaá ña yó'o ve'i noo Ndios.

13 Sa'á ñoo nakani va'a ini mií ndó, ¿á ña va'a kían ña kanonó diní na ñá'a tá ká'an na xí'in Ndios o koó?

14 Ta ná'á yó ña iin ña ka'an noo kían ña konó iin ta kua'ano nání idí diní rá.

15 Tído ña va'a va kían ña konó na ñá'a kua'ano nání idí diní ná, dá chī iin ñaño'ó v́a kían, dá chī nī ni'í ná idí diní ná ña kakuuan ña dáda'í diní ná.

16 Tído tá ká'an ndó kana'á ndó sa'a ña yó'o, dá kían kánian kana'á ndó ña ko ta'on iin ka ña'a ná'á ndu'u kee ndu xí'in dao ka na kúu kuendá Ndios, sava'a ña yó'o va kían kée ndu.

Dánani Pablo ñayuu sa'á ña ko vá'a kée na tá kua'an na kee na Santa Cena

17 Tído ña ko'in ka'in xí'in ndó viti, ko kían ña ká'an va'í sa'a ndo, chī noo ná'taka ndo dákuá'a ndó kánian dákuá'ano tá'an ndó, ta viti di'a dátúú tá'an ndó.

18 Ña mií noo ká'in xí'in ndó kían nī ni'í tó'in ña noo ná'taka ndo dákuá'a ndó, daá kuití v́a taó xóo tá'an ndó. Ta kándísai ña miían ndaa dión kée ndó.

19 Dá chī kī'o dión kánian taó xóo tá'an ndó, ká'an ndó, dá kándaá ini ndo ndá yoo kúu na miían ndaa ndíta ndaa xí'in ña dákuá'a na.

20 Chī tá ná'taka ndo sádini ndó tát'on kī'o nī chindú'u sato'o yo Jesús, ko kéndúsá'ano ndoan.

21 Dá chī noo seí ndoán, chíndaa noo dao ndó seí ndo ña né'e mií ndó nī kasáa ndo, ta ko ndáti ndó ña ka'anda naán. Sa'á ñoo dao ka ndo kándo nda'í kuíko, ta dao ka ndo xíni.

22 ¿Ndiva'a kée ndó dión? ¿Á ko ta'on ve'e ndó kasá'an ndó, ta ko'o ndó? ¿Ndiva'a kénóo ndó ve'e ño'o Ndios, ta kándaá ndo ñaño'ó na nda'í koó ña'a

né'e n̄i kasáa? ¿Ndi kaai xí'ín ndó viti? ¿Á nakoni yu'u ndo'ó ña va'a kée ndó, ká'án ndó? Koó, chí ko vá'a ta'on kée ndó.

Ki'o di'a n̄iyiká yó kee tá kua'a keeá Santa Cena

²³ Chí tát'on n̄i n̄atiin yu'u choon noo sato'o yo Jesús, k̄i'o dión sa n̄i daná'i noo ndo: Míi sakuaá n̄i nak̄i'o iin ta sato'o yo Jesús noo ndá'a ta né'e choon, dá n̄i tiin na pan.

²⁴ Dá tá n̄i ndi'i n̄i nak̄i'o na ndivé'e noo Ndios, dá n̄i sa'anda dao naán, dá n̄i kaa na: “Tiin ndó pan yó'o, ta keí ndoán, dá chí ña yó'o kúu yikí koñoi, ña kían nak̄i'oi kuu sa'a ndo. Ta daá kee ndó ña yó'o, dá ndiko'on ini ndo sa'á ña n̄i keei.”

²⁵ Ta dión ta'ani n̄i kee na tá n̄i tiin na copa vino noo n̄i ndi'i n̄i sasá'an na, dá n̄i kaa na: “Ndúta ñó'o ini copa yó'o dáxinkoo ña sa'á n̄i kandoo Ndios kee na xí'ín ñayuu na, ta xínkooan xí'ín nij yú'u. Ta k̄i'o dión kee ndó iin rá iin ta'ándá xí'i ndó ra, dá ndiko'on ini ndo sa'á ña n̄i keei.”

²⁶ Sa'á ñoó tá seí ndo pan yó'o, ta xí'i ndó vino yó'o, náchina'á ndó ñayuu ña n̄i xí'i sato'o yo Jesús sa'á kuachi yo. Ta dión kee ndó nda ná kasandaá kuu nandio koo na kasaa na.

Ndo'o n̄io ñayuu ñoó sa'á ña ko seí na pan ñoó, ta ko xí'i na ndutá uva ñoó xí'ín ñañó'ó

²⁷ Sa'á ñoó ndi ndáa miío ñayuu seí pan yó'o, ta xí'i na ndúta yó'o, ta ko kée naan xí'ín ñañó'ó, dá kían kandoo na ndio na kuachi sa'á ña xiní xíxi na yikí koño sato'o yo Jesús xí'ín nij ná.

²⁸ Sa'á ñoó miían ndúsa kánian korndodó va'a ndó n̄io ndo, nde'á á ndíta ndaa ndo, dá keí ndo pan yó'o, ta ko'o ndó ndúta ñó'o ini copa.

29 Dá chì nà seí pan ñoó, ta nà xí'i ndutá uva ñoó, ta kò kée naan xí'ín ñañó'ó, ta kò kékuendá nà ña kían yikí koño sato'o yò Jesús, dá kían ndo'o nío ná kee Ndios.

30 Ta sa' ña kée ndó dión, sa' ñoó kua' nda'o ndó kú'u, ta kua'a ta'ani ndó kuitá, ta kua'a ndo sa nì xí'i.

31 Chì tá dinño'ó taó yò kuendá ña vii káa nío yò, dá kían ná ò dándó'o ta'on Ndios nío yò.

32 Tído kéyíkò Ndios sa'a yò, ta dándó'o na nío yò viti, dá kían ná dá'a ni tanda'a ná yó ko'ò naá yó noò kánian ko'on nà kúú kuendá ñayúú yó'o.

33 Sa'a ñoó, ñani miíi, tá nì nataka ndo keí ndo pan, ta ko'o ndó ndutá uva, koo ini ndo kandati tá'an ndó, dá kasá'an ndó.

34 Tá ió iin káa ndó kuíko, dá kían va'a kà ve'e ndó kasá'an ndó, dá kían ná dá'a kà ni ya'a ndó noò nataka ndo, dá ná ò dándó'o Ndios nío ndo. Ta ió dao kà ña'a ka'in xí'ín ndó, ta ñoó kían ndeyíkoj tá ná saai noò ndéi ndó.

12

Ká'an Pablo sa'a ña xí'o oon Espiritu ij Ndios noo iin rá iin yó, dá katì'a yó kechóon yó noo ná

¹ Kóni yu'u, ñani, ña kandaa ini ndo sa'a choon nì xí'o Espiritu ij Ndios noò yò, dá katì'a yó kechóon yó noò ná.

² Ta sà ná'a va'a mií ndó ña tá nì sà kuu ndó ñayuu kò ní sá na'a Ndios ta'kí, sà xionoo ndava'a ndó sà kee yokò, ña kò tí'a ká'an.

³ Tído kónij ña kandaa ini ndo ña ni iin tó'ón ñayuu kómí Espiritu ij Ndios ò kúu ta'on dátai

chi'an na Jesús. Ta ni iin tó'ón ñayuu o kúu ka'an ña Jesús kúu sato'o na tá ko kómí ná Espíritu ij Ndios.

⁴ Ta viti, kua'á nda'o kúu noo choon nátiin yó, dá katj'a yó kechóon yó noo Ndios, tído iin tó'ón dinj vá kúu Espíritu ij Ndios, na xí'o ndidaán.

⁵ Chj kua'á nda'o noo choon ió kéchóon yó noo Ndios, tído iin tó'ón dinj vá kúu sato'o yo, na dándáki sa'án.

⁶ Ta kua'á nda'o noo choon ió kée yó, tído Ndios, na xí'o ña noo ndidaá yó, iin tó'ón vá kúu ná.

⁷ Ta noo iin rá iin yó xí'o Espíritu ij Ndios choon, dá katj'a yó dákuá'ano tá'an yó.

⁸ Chj noo dao ñayuu xí'o Espíritu ij Ndios to'on ndichí ka'an na, ta dao ka na ní'j ña ka'an na sa'á ña ná'á mií Ndios kée na kúu Espíritu ij.

⁹ Ta dao ka na ní'j ña kandeé ká'ano ini na Ndios kée mií Espíritu ij, ta dao ka na ní'j choon ña nduva'a na ñayuu kú'u kée Espíritu ij.

¹⁰ Ta noo dao ka ñayuu xí'o na ña kee na ña'a ndato, ta dao ka na ní'j ña kasto'on na sa'á to'on nj ní'j ná noo mií Ndios. Ta dao ka na ní'j ña kandaa ini na ndá yoo kómí Espíritu ij, ta ndá yoo kómí espíritu to'ón. Ta dao ka na ní'j ña ka'an na dao ka yú'u, ña ko ní dákuá'a na. Ta dao ka na ní'j ña katj'a na nandió né'e na yú'u ká'an ñayuu ñoó.

¹¹ Ta ndidaá ña yó'o kée iin tó'ón dinj mií Espíritu ij Ndios. Ta xí'o na ña noo iin rá iin ñayuu tát'on kj'o nj chikaa ini mií ná kj'o naan.

In tó'on vá kúu yó sa'á ña kúu yó kuendá Jesús

¹² Iin tó'ón vá kúu yikí koño yo, va'ará kua'á nda'o tá'í kián. Ta ndidaá tá'í ñoó, va'ará kua'á

nda'o kían, iin tó'ón yikí koño kían. Ta kị'o dión ta'ani ndó'o yó sa'á ña kúu yó kuendá Cristo,

13 chị xí'ín iin tó'ón vá Espíritu ij Ndios nị sodo ndúta ndidaá yó, dá nị nduu yó iin tó'ón, va'ará dao yó kúu na Israel, ta dao ka yó kúu na ko kúu na Israel, ta dao yó kúu na ñó'o tixi ndá'a iin sato'o, ta dao ka yó kúu na koó sato'o. Tído iin tó'ón dinị vá kúu Espíritu nị natiin yó.

14 Ta dión ta'ani ndó'o yó xí'ín yikí koño yo, chị ko kían iin tó'ón tá'í, kua'a vá tá'í kían.

15 Dá chị tá ná kaa sa'a yo: “Sa'á ña ko kúu yu'u iin ndá'a, sa'á ñoó ko kúu ta'on yu'u kuendá yikí koño yó'o”, ¿á ña yó'o kóni kaa ña ko kían kuendá yikí koño yo? Koó, dá chị ñaá vá kían.

16 Ta tá ná kaa do'o yó: “Sa'á ña ko kúu yu'u iin nduchí nóó, sa'á ñoó ko kúu ta'on yu'u kuendá yikí koño yó'o”, ¿á ña yó'o kóni kaa ña ko kían kuendá yikí koño yo? Koó, dá chị ñaá vá kían.

17 Sa'á ñoó tá iin ní yikí koño yo ná kakuu nduchí nóó, dá kían, ¿ndi koo kueídó'o yó, tá dáá? Ta tá iin ní yikí koño yo ná kakuu do'o yó, dá kían, ¿ndi koo ta'ami yó ña'a?

18 Tído mií Ndios kúu na nị chĩrndaá iin rá iin tá'í yikí koño yo noo kánian karndaaan táto'on kị'o nị konị mií ná.

19 Dá chị tá iin tó'ón tá'í ndá'a ná kakuu iin ní yó, ¿ndeí kakuu yikí koño yo, tá dáá?

20 Tído viti, va'ará kua'á nda'o tá'í kúu yikí koño yo, tído iin tó'ón dinị vá ñayuu kúu yó.

21 Ta o kúu ta'on ka'an nduchí nóó yo xí'ín ndá'a yo: “Ko ta'ón choon kuui ndo'ó.” Ta ni dinị yo, o kúu ta'on ka'an xí'ín sa'a yo: “Ko ta'ón choon kuui ndo'ó.”

22 Tído tá'í yikí koño yo, ña ká'án yó ña ko ndáya'i, ñoó di'a xínño'ó cháá ka yikí koño yo.

23 Ta dao tá'í yikí koño yo, ña ko ndáya'i noo yo, ñoó di'a kían dándixi va'a yó. Ta dión ta'ani kée yó xí'ín tá'í yikí koño yo, ña kedaá xí'á, dá xíka'an noo yo, ñoó di'a kían dáda'i yó xí'ín ñaño'ó.

24 Ta ko kánian dáda'i yó ñi yo noo va'a ná'a. Ta mií Ndios ni ndeyiko na yikí koño yo, dá natiin ña koó ñaño'ó yó noo, cháá ka ñaño'ó.

25 Ta dión ni kee na, dá kían ná dá'a ni kaño'ó tá'an tá'í yikí koño yo, di'a ná ku'u inian sa'a sátá'an.

26 Sa'a ñoó tá tárku'e'e iin tá'í yikí koño yo, ta kúu iin ní vá ñi yo u'u. Ta tá ió iin tá'í yikí koño yo va'a ndó'o, ta kúu iin ní vá ñi yo va'a ndó'o, ta kádi inian.

27 Ta ndo'ó kúu tát'on yikí koño Cristo, ta iin rá iin ndó kúu tát'on tá'í yikí koño na.

28 Ta dao ndó ni chikata Ndios ña kee ndó choon noo na kúu kuendá Jesús. Ta choon mií noo ni xi'o na kúu ña dao yó kakuu apóstol, dá kane'e yó to'on na, ta dao ka yó kakuu profeta, dá kasto'on yó to'on ni natiin yó noo mií Ndios. Ta choon kúu oni ni ni'i tá'i dao ka yó kakuu yó na dána'a. Ni ndi'i, dá ni ni'i tá'i dao ka yó choon ña kandeé yó kee yó ña'a ndato. Ndi'i, dá ni ni'i tá'i dao ka yó choon ña nduva'a yó na kú'u. Ta dao ka yó ni ni'i tá'i ña chindeé yó ñayuu kúnda'í. Ta dao ka yó ni ni'i tá'i ña kakuu yó na ka'anda choon noo na kúu kuendá Cristo. Ta dao ka yó ni ni'i tá'i ña ka'an yo dao ka yó u, ña ko ní dákuá'a yó.

29 Sa'a ñoó, ¿á ndidaá yó kúu apóstol? ¿Á ndidaá yó kúu profeta? ¿Á ndidaá yó kúu na dána'a? Ta,

¿á ndidaá yó kándéé kée ña'a ndato?

³⁰ Ta, ¿á ndidaá yó ni ni'i tá'i ña nduva'a yó na kú'u? Ta, ¿á ndidaá yó ni ni'i tá'i ña ka'an yo dao ka yú'u, ña ko ní dákuá'a yó? Ta, ¿á ndidaá yó ni ni'i tá'i ña nandió né'e yó to'on ni ka'an iin na ni ka'an iin ka yú'u? Koó, ko ta'ón dión kíán.

³¹ Sa'a ñoo ndi'i ini ndo ni'i ndo choon ndáya'i cháá ka noo Ndios. Tído viti ko'in dána'i noo ndo iin íchi va'a cháá ka.

13

Ká'an Pablo ndi kee yó, dá ku'u ini yo sa'a dao ka ñayuu

¹ Va'ará kát'i'a yu'u ká'in dao ka yú'u, ña ká'an na ndéi ñayuú yó'o o ña ká'an ángel ndéi induú, tído tá ko kú'u ini sa'a ñayuu xi'ín, dá kíán kúúí tát'on iin kaa kásá oon, o kaa chíin kádí oon.

² Ta va'ará ná natiin yu'u to'on ni kii noo Ndios, ta va'ará ndidaa ka vían ná kana'í ña ndichí ió de'é, ta va'ará ndidaa ka vían ná kana'í ndidaá kúú ña ndichí ió ñayuú yó'o, ta va'ará kandeé ká'ano ini Ndios, ña kandeéi nadaoin yúku káa nakuijan iin ka xían, tído tá ko kú'u ini sa'a ñayuu xi'ín, dá kíán ni iin ña'a ko kúúí.

³ Ta va'ará ná dasái ndidaá kúú ña'a ió nooi noo na kúnda'í, ta va'ará ná k'i'oi yikí koñoi ña kei ña, tído tá ko kú'u ini sa'a ñayuu xi'ín, dá kíán ni iin ña'a ko ndáya'i va ña ni keei.

⁴ Ña kú'u ini yo sa'a ñayuu xi'ín yó kíán ña k'i'o ndeé ini yo sa'a ná, ta va'a koo ini yo xí'ín ná. Ta ña kú'u ini yo sa'a ñayuu xi'ín yó ko kúú ta'an vaan ña koo u'u ini yo koni yo ná, ta ña kú'u ini yo sa'a

ná kọ kúú ta'an vaan ña kuvatá yó noo ná, ta ni kọ kían ña kuryíí yó noo ná,

⁵ ta ni kọ kían ña kexíxi yó xí'ín ná, ta ni kọ kían ña koo dí'inda ini yọ, ta ni kọ kían ña karyíí yó xí'ín ná, ta ni kọ kían ña kaño'o u'u ini yọ koni yọ ná,

⁶ ta ni kọ kían ña kadij ini yọ tá kée na ña kini, chi kían ña kadij di'a ini yọ tá kée na ña ndaa.

⁷ Ta sa'á ña kú'u ini yọ sa'á ñayuu xí'ín yó, sa'á ñóó kị'o ndeé ini yọ sa'a ndidaá ña'a kée na xí'á, ta noo ndidaá ña'a kandeé ini yọ ná, ta noo ndidaá ña'a kandati yó na, ta noo ndidaá ña'a ndeé koo ini yọ sa'a ná.

⁸ Ta ña kú'u ini yọ sa'a dao ka ñayuu, ni iin kuu ta'ón o ndí'an. Tído iin kuu ndi'i va ña kásto'on ñayuu to'on ni natiin na noo Ndios, ta ndi'i ta'ani ña ká'an na dao ka yú'u, ña kọ ní dákuá'a na. Ta ndi'i ta'ani ña ndichí ná'á ná.

⁹ Chi ná'á ni'ini va yó cháá ña'a Ndios, ta sava'a cháá to'on ni natiin yó noo ná, kị'o dión dána'a yọ.

¹⁰ Tído tá ná kasandaá kuu koo ndidaá ña'a táto'on kị'o kóni Ndios kooan, dá kían ndi'i va ndidaá ña kéchóon tóo yó viti.

¹¹ Tá ni sa kuu yu'u iin tayíí ló'o, dá sa ka'in táto'on ká'an xi, ta sa nakani ini táto'on kị'o ná'ani ini xi, ta sa ndo'i táto'on kị'o ndó'o xi. Tído tá ni kasandaá kúúí iin ta yatá, dá ni dankooi ña kée iin tayíí ló'o.

¹² Chi ña ndó'o yó viti kían táto'on kị'o ndó'o yó tá ndé'é yó noo iin espejo kọ ná'a va'a, chi cháá vá ña'a ná'á yó viti. Tído kasandaá iin kuu, dá koni xí'ín noo yọ Ndios. Ta viti kían cháá vá ná'á yó sa'a ná, tído nda daá ví, dá kana'á va'a yó Ndios táto'on kị'o ná'á mií ná yó.

¹³ Ta viti, daá ná koo ini yò kandeé iní yò Ndios, ta daá kuití ná kandati yó na xí'ín tandeé iní, ta daá kuití ná ku'u ini yò sa'á ñayuu xí'ín yó. Tído ña ndáya'i cháá ka noo ndin oní ña yó'o kían ku'u ini yò sa'á ñayuu xí'ín yó.

14

Di'a kee ndó tá nì natiin ndó noo Ndios ña kati'a ndó ka'an ndo iin yú'u kò ní dákuá'a ndó

¹ Sa'á ñóó koo ini ndo ku'u ini ndo sa'á ñayuu xí'ín ndó. Ta ndukú ndó ña kakomí ndó choon, ña kían xí'o Espíritu ií Ndios noo ndo, dá kati'a ndó kechóon ndó noo ná. Tído katoó cháá ka ndo choon ña kían kásto'on ndó xí'ín ñayuu to'on nátiin ndó noo mií Ndios.

² Dá chî ñayuu ká'an iin yú'u kò ní dákuá'a na, kò ká'an ta'on na xí'ín dao ka ñayuu, sava'a xí'ín Ndios vá ká'an na, dá chî kò kándaá ini dao ka ñayuu ña ká'an na, chî kíán iin ña'a kò kátóni ini yò nì xí'o mií Espíritu ií Ndios noo ná.

³ Tído tá'an ñayuu kásto'on to'on nì natiin na noo Ndios xí'ín dao ka ñayuu, na yó'o kúú na xí'o ña kua'ano cháá ka ñayuu xí'ín to'on Ndios, ta ká'an ni'ini na noo ná, ta xí'o ñaá ná tandeé iní.

⁴ Chî na ká'an iin ka yú'u kò ní dákuá'a na, noón kúú na dákuá'ano mií vá ná. Tído na kásto'on xí'ín ñayuu to'on nì natiin na noo mií Ndios, na yó'o kúú na dákuá'ano ndidaá ñayuu kuendá Jesús xí'ín to'on Ndios.

⁵ Kóni yu'u ña kían ndidaá ndó ka'an iin yú'u kò ní dákuá'a ndó, tído va'a cháá ka ví kíán tá ná kásto'on ndó to'on nì natiin ndó noo mií Ndios xí'ín ñayuu. Dá chî va'a cháá ka kée na kásto'on

to'on n̄i n̄atiin na noo Ndios o duú ka na ká'an iin ka yú'u. Tído tá ió dao na n̄i n̄atiin ña kándaḡ ini na ndi kóni kaa yú'u ká'an na ñoó, dá kían kua'ano ñayuu kuendá Jesús xí'ín to'on Ndios.

⁶ Sa'á ñoó, ñani, tá ná saa yu'u noo ndéi ndó xaḡn, ta kasá'í ka'in xí'ín ndó iin yú'u ko kándaḡ ini ndo, ¿ndi kían va'a ni'í ndo, tá dáá? Tído tá ná ka'in xí'ín ndó sa'a iin to'on saá ni xí'o Ndios nooí, o sa'a iin to'on ndichí ni ni'í noo ná, o sa'a iin to'on ni n̄atiin noo ná, o sa'a iin ka to'on ndaa, dá kían kandaḡ ini ndo.

⁷ Miíḡn ndaa ko náki'in tá'an nóo ta'on noo ká'an yír tuú xí'ín yír dáká'a ra. Tído tá ko ká'a rá tát'o'n kí'o kánian ka'a rá, dá kían, ¿ndi kee yó kandaḡ ini yo ndá yaa tuú na, o ndá yaa dáká'a na?

⁸ Ta tá ná o tuú ndísá'ano ra iin trompeta, dá kían, ¿ndi koo kandaḡ ini soldado ña kánian kenduu ra mií rá ko'on ra naá ra?

⁹ Ta kí'o dión ta'ani ndó'o ndo'ó tá ká'an ndo iin yú'u ko kándaḡ ini dao ka ñayuu. ¿Ndi kee na kandaḡ ini na ña ká'an ndo? Ta noo táchi vá ká'an ndo.

¹⁰ Kua'á nda'o yú'u ká'an ñayuu ndéi ñayuú yó'o, ta iin rá iin ñayuu kándaḡ ini yú'u ká'an na.

¹¹ Tído tá ko kándaḡ ini yu'u yú'u ká'an dao ka ñayuu, dá kían iin ta tukú vá kúu yu'u noo ná. Ta dión ta'ani iin na tukú vá kúu ná noo yú'u.

¹² Sa'á ñoó ndo'ó, na kátoó kakomí choon xí'o Espíritu iḡ Ndios, ndi'í cháá ka ini ndo kakomí ndó choon dákuá'ano ndó dao ka na kúu kuendá Jesús xí'ín to'on Ndios.

¹³ Sa'á ñoó ndi ndaa ndó ká'an iin ka yú'u ña kían ko ní dákuá'a ndó, dá kían kaka ndo noo Ndios ña

ná k̄i'o na ña kat̄i'a ndó nandió né'e ndó ndi kóni kaa yú'u ká'an ndo.

14 Dá ch̄i tá ká'an yu'u xí'ín Ndios xí'ín iin ka yú'u kō kándaá ini, dá kían miian ndaa ká'in xí'ín ná xí'ín esp̄irituí, tído ña yó'o kō chindeéán ñaxintóni.

15 ¿Ndá kían kee yu'u, tá dáá? Kánian ka'in xí'ín Ndios xí'ín esp̄irituí, tído káni ta'anian ka'in xí'ín ná xí'ín ñaxintóni. Kánian katai xí'ín esp̄irituí, tído káni ta'anian katai xí'ín ñaxintóni.

16 Ch̄i tá kéká'ano ndó Ndios xí'ín sava'a esp̄iritu ní ndó, ta nákaa iin na kō kándaá ini to'on ká'an ndo, dá kían, ¿ndi kee na kaa na: “Dión ná koo”, sa'á ndivé'e ni nak̄i'o ndó noo Ndios? Ch̄i kō ní kándaá ini na ndí kían ni ka'an ndo.

17 Ch̄i miian ndaa kuiti va'a ni kee ndó ni nak̄i'o ndó ndivé'e noo Ndios, tído kō ní sá'ano dao ka ñayuu xí'ín to'on Ndios, ch̄i kō ní kándaá ini na.

18 Náki'o yu'u ndivé'e noo Ndios, dá ch̄i ká'an cháá kai dao ka yú'u, ña kō ní dákuá'i, o duú ndidaá ka ndo'ó.

19 Tído tá nákaa ini ve'e noo nátaaka ndo, dá kían kátoó cháá kai ká'in va'ará o'on káa to'on, ña kían kándaá ini, dá dána'i noo ndo, o duú ña ka'in ux̄i mil to'on xí'ín iin yú'u, ña kō kándaá ini ñayuu.

20 Ñani mií, o sa kákuu ñaxintóni ndo ñaxintóni takuáli leé. Va'a kaan takuáli kakuu ndó, tído noo kuachi va, dá ch̄i kō ná'á xí sa'á kuachi kini. Na yatá kakuu ndó noo ña nákani ini ndo sa'á ña'a Ndios.

21 Dá ch̄i k̄i'o di'a kaá tuti i Ndios: “Ka'in xí'ín na ñoo xí'ín yú'u na tukú, xí'ín iin yú'u kō ná'á ná. Ta va'ará xí'an dión ná keei, o kékuendá ta'on na ña ka'in xí'ín ná, kaá sato'o yo Ndios.”

22 Sa'á ñoó, tá ká'an ndo iin ka yú'u, ña kō ní

dákuá'a ndó, ñoó kían ná'a noó ñayuu ko kándísa ña ío Ndios xí'ín ndó, tído ko chindeéan ñayuu sa kándísa. Tído tá kásto'on ndó xí'ín ñayuu to'on ni ñatiin ndó noo mií Ndios, ña yó'o kían chindeé cháá ka ñayuu kándísa o duú na ko kándísa.

²³ Sa'á ñoó tá ni ndítútí ndidaá ndó ini ve'e noo nátaaka ndo, ta ndéi ndó ka'an ndo iin yú'u ko ní dákuá'a ndó, ta ni kasáa iin na kátoó kueídó'o to'on Ndios o iin na ko kándísa, dá kaa na xí'ín ndó ña lóko va kúú ndó.

²⁴ Tído tá ndidaá ndó ni kasá'á kásto'on to'on ni ñatiin ndó noo mií Ndios, ta ni kasáa iin na ko kándísa o iin na kátoó kueídó'o to'on Ndios, ta kúú to'on yó'o kedaá xí'ín ná, ta kandaá ini na ña kómí ná kuachi, dá kasá'á nakani ini na ña ko vá'a kée na.

²⁵ Dá kían nono nda maá ini níó ná kandaá ini na ña ko vá'a kée na, dá taxí tá'an na nakuíta xítí ná noo Ndios, ta keká'ano ñaá ná. Ta kaa na xí'ín ndó: “Miían ndaá kuiti ío Ndios xí'ín ndó.”

Koo ini ndo ña ndidaá ña'a kee ndó ná dákuá'anoan ndo íchi Ndios

²⁶ ¿Ndi koo kee yó viti, tá dáá, ñani? Tá ni ndítútí ndó ini ve'e noo nátaaka ndo, dá keká'ano dao ndó Ndios xí'ín iin yaa, ta dao ka ndo dána'a to'on Ndios, ta dao ka ndo ka'an iin to'on saá ni ñatiin ndó noo mií Ndios, ta dao ka ndo ka'an yú'u ko ní dákuá'a ndó, ta dao ka ndo nandió né'e ndi kóni kaa yú'u ni ka'an dao na. Tído koo ini ndo kendaá ndo ndidaá ña yó'o, dá ná kua'ano dao ka ndo íchi Ndios.

²⁷ Tá kua'an ndo ka'an ndo iin yú'u ko ní dákuá'a ndó, dá kían sava'a uu ndo, o oni ndo ka'an. Tído

iin rá iin ni ndó ka'an. Ta kánian koo iin na t̄i'a nandió né'e ndi kóni kaa to'on ni ka'an ndo.

²⁸ Tído tá k̄o íin t̄i'a nandió né'e yú'u ni ka'an ndo, dá kían ná dá'a ni nakūita ndó ka'an ndoán. Va'a kaan ndató'ón kayá ni ndó xí'ín Ndios.

²⁹ Ta dión ta'ani ná kee na kua'an kasto'on to'on ni natiin na noo mií Ndios ini ve'e noo náta ka ndo. Sava'a uu na, o on̄i na ná ka'an. Ta dao ka ndo kandeí ta'í iní sa'á to'on ni ka'an na.

³⁰ Tído tá ni natiin iin na ió seídó'o iin to'on saá noo Ndios, dá kían ná katuu tóo na íin ká'an, dá kuu ka'an na sa'á to'on saá ni natiin na.

³¹ Iin rá iin ni ndó ya'a kasto'on to'on ni natiin ndó noo mií Ndios, dá kían ndidaá ndó kandaá cháá ka ini ndí kían kóni Ndios, dá koo cháá ka t̄andeé iní ndo xí'ín ná.

³² Ch̄i iin na ni natiin to'on noo mií Ndios kasto'on na, ió choon noo ndá'a ná ña katuu tóo na noo ká'an na,

³³ dá ch̄i Ndios, na ndáño'o yó, k̄o kúú ta'on na iin Ndios xí'o ña nakūina vaá yo. Di'a xí'o na ña kandeí yó xí'ín ñaño'ó.

Táto'on k̄i'o kée dao ka na kúú ñayuu Ndios ini ve'e noo dákuá'a na,

³⁴ kánian tádi kandeí na ñá'a ve'e noo náta ka ndo dákuá'a ndó, ch̄i k̄o ta'ón ích̄i ná ndató'ón ná. Di'a kánian kaño'o na t̄ixi ndá'a yíi ná táto'on k̄i'o sa'ándá ley Ndios choon.

³⁵ Tá ndáa ña'a k̄o ní kandaá ini na, dá kían tá ná nasaa na ve'e na, dá ná ndató'ón ná yíi ná. Dá ch̄i iin ña ka'an noo kían ña ndató'ón ná ini ve'e noo náta ka ndo dákuá'a ndó.

³⁶ ¿Á sava'a noo ndo'ó ni natoon to'on Ndios, xiní ndo? O, ¿á sava'a noo ndo'ó ní ni kasáaan,

ká'án ndó?

³⁷ Tá ió iin káa ndó ká'án ña kúú ndó na ni natiin to'on noo mií Ndios, o ká'án ndó ña kómí ndó iin choon ni xi'o Espíritu ij Ndios noo ndo, dá kían kánian nakoni ndo ña choon táai noo tuti yó'o kúú choon sa'ándá Ndios, na kúú sato'o yo.

³⁸ Tá ió iin káa ndó ko nákoní ña dión kían, dá kían ná dá'a ni nakoni ndo ná.

³⁹ Sa'á ñoó, ñani, ndi'i ini ndo natiin ndó choon ña kasto'on ndó to'on ni ni'i ndo noo mií Ndios. Ta o sa chítuu ndó dao ka na ña ka'an na iin ka yú'u ko ní dakuá'a na,

⁴⁰ tído kee ndó ndidaá ña yó'o xí'ín ñaño'ó, ta yíko kee ndó ña.

15

Ká'an Pablo sa'a ndi koo tá ná nataki na ni xi'i

¹ Ñani mií, ko'in kasto'in xí'ín ndó sa'á to'on va'a sa'a Jesucristo, tá'an ña sa ni daná'i noo ndo, tá'an ña ni natiin ndó, ta ndíta toon ndó xí'án.

² Tá ná kandita toon ndó xí'ín mií to'on va'a yó'o, ña ni daná'i noo ndo, dá kían ni'i ndo ña kaki ndó. Tá koó, dá kían ko chóon ta'on ña kándisa ndó.

³ Chi ña mií noo ni daná'i noo ndo kúú to'on ni xi'o mií Ndios noo, chi ni daná'i noo ndo ña ni xi'i Cristo Jesús sa'á kuachi yó, tá ki'o dión, dá ni xinkoo noo ká'an tuti ij Ndios.

⁴ Dá ni nduxi na. Ta ni nataki na tixi kuuy óni, dá ni xinkoo noo ká'an tuti ij Ndios.

⁵ Dá ni na'a noo ná noo Cefas. Ndi'i daá ni na'a noo ná noo ndin uxí uú taa ni sa xionoo xí'ín ná.

⁶ Tá ni ndi'i, dá ni na'a noo ná noo o'on ciento ka ñayuu kúú kuendá na. Ta kua'a ij vá na yó'o ndéi takí, tído dao na ni xi'i.

⁷ Tá n̄i ndi'i, dá n̄i na'a noo ná noo Jacobo. Ndi'i, dá n̄i na'a noo túku na noo ndidaá t̄a kúú apóstol, tá'an r̄a n̄i kaxi na kane'e to'on na.

⁸ Nd̄a noo ndí'i kuií, dá n̄i na'a noo ta'ani na noo mií yu'u, sa'á ñoó kúúí t̄ato'on iin taló'o kueé n̄i kaki.

⁹ Ta kúúí na nóo cháá k̄a noo ndidaá k̄a apóstol, ta k̄o k̄áni vían ñ̄a k̄ananí yu'u ñ̄a kakuui apóstol, chí sa x̄ionoo yu'u sa kendava'i x̄í'ín na kúú kuendá Jesús.

¹⁰ Tído sa'á ñ̄a man̄i n̄i kee Ndios x̄í'ín, sa'á ñoó n̄i kee na yu'u kúúí iin apóstol. Ta ñ̄a man̄i n̄i kee na x̄í'ín yu'u, k̄o ní naá óon ta'an vaan. Di'a kéchóon cháá k̄a o duú ndidaá k̄a ni t̄a né'e to'on na. Tído o duú mií yu'u kéchóon, mií vá Ndios kúú na ch̄índeé yu'u sa'á ñ̄a man̄i n̄i kee na x̄í'ín.

¹¹ Tído k̄o t̄a'ón ñ̄a'a kíán á yu'u o dao k̄a na dána'a noo ndo. Chí sa'á ñ̄a yó'o dána'a ndi'i ndu, ta ñ̄a yó'o kíán kándísa ndó.

¹² Ndu'u kúú na dána'a ñ̄a miían ndaa kuiti n̄i nataki Jesús tein na n̄i x̄i'í, sa'á ñoó, ¿ndiva'a ká'an dao ndó ñ̄a o nátaki ta'on na n̄i x̄i'í?

¹³ Tído tá ná o nátaki na n̄i x̄i'í, dá kíán ni Cristo k̄o ní nátaki, ní kúu.

¹⁴ Tído tá k̄o ní nátaki Jesús, dá kíán k̄o chóon ta'on to'on n̄i daná'a ndu noo ndo, ta ni ñ̄a kándísa ndó sa'a Jesús k̄o chóon, ní kúu.

¹⁵ Tá k̄i'o dión kíán, dá kíán n̄i k̄andoo ndu kúú ndú na ká'an to'ón sa'a Ndios, dá chí x̄i'o ndu kuendá ñ̄a Ndios kúú na n̄i danátaki Cristo. Tído k̄o ní nátaki ta'on Cristo tá miían ndaa o nátaki na n̄i x̄i'í, ní kúu.

¹⁶ Chí tá ná o nátaki na n̄i x̄i'í, dá kíán ni Cristo k̄o ní nátaki ta'on, ní kúu.

17 Tá kọ ní náta_ki Jesús, dá kían kọ chón ta'on ña kándéé iní ndo ná, ta kómí i_i vá ndó kuachi noo Ndios.

18 Tá dión kíán, dá kían n_i naá óon va na n_i xi'i íchi Cristo.

19 Sa'a ñoó tá sava'a ñayuu yó'o va ió tandeé iní noo yo xí'ín Cristo, dá kían nda'í cháá ka ndó'o yó o duú ndidaá ka ñayuu ndéi ñayuu yó'o.

20 Tído miían ndaa kuiti va n_i nataki Cristo tein na n_i xi'i, ta mií ná kúú na mií noó n_i nataki, sa'a ñoó miían ndaa nataki ndidaá ka ñayuu n_i xi'i.

21 Ta sa'a iin tó'ón taa, sa'a ñoó ndidaá kúú ñayuu xí'i. Ta dión ta'ani sa'a iin ka taa nataki na n_i xi'i.

22 Ch_i sa'a ña n_i kee Adán kuachi, sa'a ñoó ndidaá ñayuu xí'i. Ta dión ta'ani, sa'a ña n_i nataki Cristo, sa'a ñoó ndidaá ñayuu n_i xi'i n_i'í ña nataki na.

23 Tído iin rá iin ña'a ió yíkoan táto'on k_i'o n_i chikaa iní Ndios kooan. Ch_i dinño'ó Cristo n_i nataki, dá tá ná nandió koo na kasa na, dá ví nataki ñayuu kuendá na.

24 Dá kasandaá ku_u naá ñayuu yó'o, dá naki'o Cristo ndidaá kúú choon noo ndá'a tatá Ndios tá n_i ndi'i n_i kandeé ná n_i ditá ná choon noo ndá'a ndidaá ña sa kómí ndéé, xí'ín ndidaá ra sa sa'anda choon xí'ín ndidaá ra sa dandáki ñayuu yó'o.

25 Dá ch_i miían kánian dándáki Cristo nda ná nataán ndi'i Ndios ta xini u'u ñaá tixi sa'a ná.

26 Dá nda noo ndi'i kuií, dá kían dánaa na ña xini u'u ñaá, tá'an ña kédaa xí'ín yó, dá xí'í yo.

27 Ch_i ndidaá vá ña'a nataán Ndios tixi sa'a Cristo. Tído tá kaaan ña ndidaá vá ña'a kaño'o tixi ndá'a ná, kọ kóni kaaan ña kaka ta'ani mií Ndios, ch_i mií vá ná kúú na n_i nataán ndidaá kúú ña'a tixi sa'a ná.

28 Tá n̄i ndi'i n̄i ndu'u ndidaá kúú ña'a t̄ixi ndá'a Cristo, dá ndu'u mií Cristo, n̄a kúú de'e Ndios, t̄ixi ndá'a mií Ndios, n̄a n̄i ñaki'o ndidaá kúú ña'a t̄ixi ndá'a ná. Dá k̄ian mií Ndios kakuu n̄a mií noó noo ndidaá ña'a.

29 Ta viti, ¿ndiva'a sódo ndúta dao ndó sa'á ñayuu n̄i xi'i tá ko kándisa ndó ña nataki n̄a n̄i xi'i? ¿Ndi-va'a sódo ndúta ndo sa'á n̄a n̄i xi'i, tá dáá?

30 Ta, ¿ndiva'a daá kuití ndó'o níno ndu'u sa'á to'on Ndios tá ná o nátaqi n̄a n̄i xi'i, tá dáá?

31 Ká'an ndaai xí'in ndó, ñani, ña sa'á ña kadii ini yu'u sa'á ña n̄i kee sato'o yo Jesucristo xí'in ndó, sa'á ñoo ndidaá kuu vá ió ña kuui.

32 Ta n̄i xió né'e tá'in xí'in ta tondó ndéi ñoo Éfeso, tído, ¿ndí k̄ian va'a ni'i yu'u tá dión ná o nátaqi n̄a n̄i xi'i? Dá ch̄i tá ná o nátaqi ñayuu n̄i xi'i, dá k̄ian: “Ná kasá'an yó, ta ná ko'o yó, ta ná x̄inió, dá ch̄i iin taan kuu va yó.”

33 O sa kí'o ndó mií ndó ña danda'í n̄a ndo'ó, dá ch̄i: “Tá xionoo ndó xí'in ta k̄ini, dá k̄ian dátuu vá rá ndo'ó noo ña va'a kée ndó.”

34 Sa'á ñoo k̄anian ndito koo ini ndo, dá ná o yá'a ndó kee ndó kuachi noo Ndios. Ch̄i ndéi dao ñayuu ko ná'a Ndios tein mií ndó xaan. Dión ká'an yu'u xí'in ndó, dá ná kaka'an noo ndo.

K̄i'o di'a koo, dá nataki n̄a n̄i xi'i

35 Ndá ndi kuu ndato'ón iin káa ndo'ó, ta kaa ndo: “¿Ndi koo, dá nataki ñayuu n̄i xi'i? ¿Ta ndi koo yiki koño kandixi na noo nataki n̄a?”

36 Ñayuu x̄ixi kúú ndó. Ch̄i tá chí'i ndó iin tata noño'ó ndo, miian ndúsa k̄anian kuuan t̄i ñó'o, dá dákuitaan kakuuan iin yukú saá.

37 Ta ña chí'i ndó noñó'o ndo ko kían sa iin yuku kuí, di'a dinñó'ó iin tata ichi kían chí'i ndó, miñan kían noni tirió o dao ka tata.

38 Tído mií vá Ndios kúu na xí'o ndi koo iin rá iin yuku táto'on ni chikaa ini mií ná kooan, sa'á ñoó iin rá iin tata xí'in yukúan.

39 Ta dión ta'ani o duú iin nóo kúu ndidaá yiki koño. Chi dín vá kúu yiki koño ñayuu, ta sa dín vá kúu yiki koño kirí kúu kítj. Ta sa dín vá kúu yiki koño tiyaká, ta sa dín vá kúu yiki koño kirí ió tomi.

40 Ió yiki koño kómí na ndéi induú, ta dín vá kúu yiki koño kómí ñayuu ndéi noñó'o yó'o. Chi ndato cháa ka yiki koño kómí na ndéi induú o duú yiki koño kómí na ndéi noñó'o yó'o.

41 Ta dión ta'ani dín vá ndato ndiandii, ta dín vá ndato yoo. Ta dín vá ndato tiñoo. Ta dín vá ndato dao tiñoo noo dao ka ri.

42 Ta kí'o dión ta'ani ndo'o na ni xi'i tá ná natakí na, chi yiki koño na, ña ni nduxi, kían té'i. Tído tá ná natakí na, dá kían nani'i ná iin yiki koño, ña ni iin kuu o té'i.

43 Chi yiki koño ni nduxi kúu iin yiki koño kañó'ó ñayuu. Tído tá ná natakían, dá nduuan iin ña'a ndato. Chi tá ni nduxian ni sa kian iin ña'a koó ndé. Tído tá ná natakían, dá nduuan iin ña'a ió ndé.

44 Tá ni nduxian, dá ni sa kían iin yiki koño kómí na ndéi noñó'o yó'o. Tído tá ná natakían, dá nduuan iin yiki koño kómí na ndéi induú. Dá chi ió yiki koño kómí na ndéi noñó'o yó'o, ta ió ta'ani yiki koño kómí na ndéi induú.

45 Chi ká'an tuti iñ Ndios ña mií Ndios ni kava'a taa mií noó, tá'an ra sa naní Adán, ta ni xi'o na ña

n̄i sa taki ra. Tído Cristo, na n̄i kii sata Adán, noón kúú iin Esp̄ritu x̄i'o ña kataki chíchí yó.

46 Tído ko ní ni'i yo yikí koño kuendá induú mií noó, di'a n̄i ni'i yo yikí koño kuendá noño'o yó'o va. Ndi'i, dá ni'i yo yikí koño kuendá induú.

47 Ch̄i ta mií noó n̄i sa kuu kuendá noño'o yó'o, ch̄i n̄i kava'a ra x̄i'ín ñó'o. Tído ta kúú uu, na kúú sato'o yo, noón kúú kuendá induú, ch̄i n̄i kii na chí induú.

48 Dá ch̄i tát'on k̄i'o káa yikí koño sa komí ta n̄i kava'a x̄i'ín ñó'o, k̄i'o dión kúú yikí koño na kúú kuendá noño'o yó'o. Ta yikí koño na kúú kuendá induú kúúan tát'on yikí koño na n̄i kii induú.

49 Ta viti ndáa yikí koño yo tát'on k̄i'o n̄i sa kaa yikí koño ta n̄i sa kuu kuendá noño'o yó'o. Tído kasandaá iin kuu, dá nduu yikí koño yo tát'on káa yikí koño na n̄i kii chí induú.

50 Sa'a ñoó ká'in x̄i'ín ndó, ñani mií, ña o kúu ta'on ndu'u koño yo x̄i'ín ni yo noo dándáki N̄dios. Ch̄i ña'a túú, o kúu ta'on natiian kuendá noó ña'a ko túú.

51 Ta viti kóni ka'in x̄i'ín ndó sa'a iin ña'a ná'á iin tó'on mií N̄dios. O duú ndidaá vá yó kuu, tído ndidaá vá yó ndesaá N̄dios yikí koño,

52 ch̄i iin ndakána va kakuuan, tát'on k̄i'o kée noo yo tá nákuani yo. Dión koo tá tuu trompeta noo ndi'i. Dá ch̄i tá n̄i tuu trompeta, dá nataki na n̄i xi'i, ta ni'i ná iin yikí koño o té'i. Ta ndidaá yó, na ndéi takí, ndesaá N̄dios yikí koño yo.

53 Dá ch̄i miían ndusa nadaon yikí koño té'i yó'o, dá kandixi yó iin yikí koño, ña n̄i iin kuu o té'i. Ta yikí koño yó'o, ña xi'i, kánian nadaon, dá kandixi yó iin yikí koño, ña kían ni iin kuu o kuú.

54 Tá n̄i ndi'i n̄i n̄adaon yikí koño té'i yó'o, ta n̄i n̄andixi yó iin yikí koño k̄o té'i, ta tá n̄i ndi'i n̄i n̄adaon yikí koño yó'o, ñ̄a xí'i, ta n̄i n̄andixi yó iin yikí koño, ñ̄a ni iin kuu ̄o kuú, dá x̄inkoo to'on ká'an tuti īi Ndios, ch̄i di'a kaáan: “N̄i k̄andeé Ndios n̄i d̄anaá n̄a noó ñ̄a k̄edaá xí'in ñ̄ayuu, dá xí'i na.

55 Sa'á ñ̄oó, yo'ó, ñ̄a k̄edaá xí'in ñ̄ayuu, dá xí'i na, ¿ndeí kua'an íon? Ta yo'ó, yá̄i ndii, ¿ndeí kua'an ñ̄a sa k̄andeéon xí'in ndii?”

56 Ch̄i íon, ñ̄a k̄edaá xí'in yó, dá xí'i yo, kúú kuachi kée yó. Ta ley Moisés k̄ian dátāi kuachi yó sa'á ñ̄a yá'a yó kee yo kuachi.

57 Tído viti ná nak̄i'o yó ndivé'e noo Ndios, ch̄i n̄i k̄andeé yó xí'in ndidaá ñ̄a yó'o sa'á ñ̄a n̄i kee Jesucristo, n̄a kúú sato'o yo.

58 Sa'á ñ̄oó, n̄a man̄i mīi, kandita toon ndó, ta kandita ndaa ndo xí'in ñ̄a ndaa kándisa yó. Ta ndi'i ini ndo kechóon ndó choon sato'o yo Ndios, ta ̄o sa kátuu ndó kee ndóan. Ch̄i ná'á vá mīi ndó ñ̄a choon kée yó noó n̄a kúú sato'o yo, ̄o naá óon ta'an vaan.

16

Ká'an Pablo sa'á di'on dátaká ñ̄ayuu ñ̄oó, dá chindeé ná n̄a kúnda'i

1 Ta viti ko'in ka'in xí'in ndó sa'á di'on dátaká ndo, dá chindeé ndó n̄a kúú ñ̄ayuu Ndios ndéi ñ̄oo Jerusalén. Koo ini ndo kee ndó tát̄o'on k̄i'o n̄i sa'andāi choon noó n̄a kúú kuendá Jesús ndéi chí kuendá Galacia di'a.

2 Ta iin iin kuú kasá'á sa'a semana, kánian taó xóo iin rá iin ndó noó ya'i tát̄o'on k̄i'o n̄i ni'i ndo noó n̄i kechóon ndó, ta taxi va'a ndóan. Dá k̄ian tá

ná saai noo ndéi ndó xaan, ná dá'a ni nditúti ndóan mií hora daá.

³ Dá tá ná saai noo ndéi ndó, dá k̄i'oi iin tuti noo taa ni ndukú mií ndó, dá tanda'í ra ko'on ra xí'ín d̄i'ón ni nditúti ndó chindeé ndó na kúnda'í ndéi ñoo Jerusalén.

⁴ Tído tá kánian ko'on yu'u, dá k̄ian kane'e tá'an daó rá ko'on ra xí'ín.

Kóni Pablo ko'on na korni'ini na ñoo Corinto cháa tiempo

⁵ Saai noo ndéi ndó tá ni ndi'i ni ya'i chí kuendá Macedonia, chí Macedonia ñoo kánian ya'i.

⁶ Ndá ndi kuu koo tooi xí'ín ndó, o ndá ndi kuu kandoi kooi xí'ín ndó tein ndidaá yoo vixi, dá kuu chindeé ndó yu'u ná ko'in noo kánian ko'in.

⁷ Ko kóni ña k̄ian chika'anda oon ni noo ndéi ndó, chí k̄on̄i kooi cháa tiempo xí'ín ndó tá k̄i'o dión kóni na kúu sato'o yo.

⁸ Tído koo too vai ñoo Éfeso yó'o nda ná kasandaá kuu víko Pentecostés,

⁹ dá chí ndato nda'o nónó nooi kechóoin noo Ndios, ta ió iin tandeé ini ká'ano ña kua'a cháa ka ñayuu kandisa to'on Jesús, va'ará kua'á nda'o na xiní u'u ñaá.

¹⁰ Tá ni saa Timoteo noo ndéi ndó xaan, koo ini ndo keva'a ndó xí'ín xí, dá ná kadii ini xi koo xi xí'ín ndó, dá chí kéchóon xi noo na kúu sato'o yo tát'on k̄i'o kéchóon mií yu'u.

¹¹ Ta ni iin ndó o sa kú'ich̄i ini koni ndo xí. Di'a koo ini ndo chindeé ndó xi, dá ná koo va'a ini xi nandió koo va'a xi kii xi noo iói, dá chí ió yu'u ndátii ndisaa xi xí'ín dao ka ñani yo.

12 Ta kónij ña kandaá ini ndo sa'a ñani yo Apolos. Ni seí nda'ávij noo ná ña saa na xí'ín dao ka ñani yo kande'é ná ndo'ó. Tído ko ní xín ta'on na saa na viti. Tído tá ni nono ná iin ka ta'ándá, dá saa na koo too na xí'ín ndó.

Xí'ín ndisá'án yó'o dándí'i Pablo ña ká'an na

13 Ta kaño'o ini ndo, ta kandita toon ndó xí'ín ña ndaa kándisa yó, ta cho'on taa ini ndo, ta ndakí koo ndó.

14 Ta noo ndidaá ña kée ndó, kee ndoan xí'ín ña kú'u ini ndo sa'a dao ka ñayuu.

15 Ñani, sa ná'á vá ndó ña na ve'e Estéfanos ni sa kuu na mií noo ni kandisa to'on va'a sa'a Jesús noo ñayuu ndéi chí kuendá Acaya xaan. Ta ná'á ta'ani ndó ña ni nakí'o na mií ná ña chindeé ná ndidaá kúu na kúu ñayuu Ndios.

16 Ta seí nda'ávij noo ndo ña kueídó'o ndó ndidaá ka ni ñayuu kée táto'on kée na yó'o, xí'ín ndidaá ka na chindeé dao ka ñayuu, na kéchóon noo choon yó'o.

17 Ta kádij nda'o inij sa'á ña ni kasáa Estéfanos, xí'ín Fortunato, xí'ín Acaico, ta ni ndundeé inij, va'ará koó mií ndó ndéi xí'ín,

18 chí ni xí'o na tandeé iní nooí táto'on kí'o kée ta'ani na xí'ín mií ndó. Ta koo iní ndo nakoni ndo ñayuu kée táto'on kí'o kée na yó'o.

19 Ndidaá na kúu kuendá Jesús ndéi chí kuendá Asia ká'an na ndisá'án xí'ín ndó. Ta ñani yo Aquila, xí'ín kí'o yó Priscila, xí'ín ndidaá na kúu kuendá Jesús náta ka dákuá'a ve'e na ká'an na ndisá'án xí'ín ndó sa'á ña kúu ndó kuendá sato'o yo Jesús.

20 Ta ndidaá na kúu ñani yo ndéi yó'o ká'an na ndisá'án xí'ín ndó. Ta viti chító tá'an ndó noo ndo,

ta ña yó'o ná kakuu iin ñaño'ó ka'an tá'an ndó ndisá'án sa'á ña kúú ndó kuendá Jesús.

²¹ Ta yu'u kúú Pablo, ta táai ndisá'án yó'o kosaa noo ndo xí'ín ndá'a mííí.

²² Ta tá ió iin káa ndó kóni Jesucristo, na kúú sato'o yo, dá kían chi'an ná katai ndo kee Ndios. Sato'o yo Jesús, nakíi kíi ní.

²³ Ta ná koo ña maní xí'o sato'o yo Jesucristo xí'ín iin rá iin ndó.

²⁴ Kú'u ndava'o inij sa'a ndidaá ní ndó sa'á ña kúú yó kuendá Cristo Jesús. Díón ná koo.

**Tuti yó'o kúú to'on Ndios, ta xí'o ña kuendá
sa'a Jesús
New Testament in Mixtec, Tezoatlán (MX:mx:Mixtec,
Tezoatlán)**

copyright © 2006 Wycliffe Bible Translators, Inc.

Language: Mixtec, Tezoatlán

Translation by: Wycliffe Bible Translators, Inc.

Mixteco, Tezoatlán [mx], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Tezoatlán

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

b81ac6b3-0ad5-5336-8d42-4c2703b04e9f